

Lukim 7-pela pes bilong NCD Gavana Teknikal na Vokesenel edukesen Trening Skolasip Skim. Pes 9, 10, 11, 12, 13, 14, 15



Presiden bilong Indonesia, Joko Widodo i bin kam long PNG long dispela wik Mande. Em i bin bung wantaim Praim Minista Peter O'Neill long haus Palamen, na em i bin go tu long Indonesia Embasi. Poto hia i soim ol PNG Difens Fos i kisim Presiden Widodo i go long balus bilong em i wet i stap long Jacksons ples balus taim em i laik go bek long Indonesia long dispela wik Tunde. Poto: Nicky Bernard

Lukim moa stori long pes 2 na 4...

INSAIT:

Trukai Rais Saplimen



Pes 25, 26, 27

Presiden bilong Indonesia i kam long PNG - P2



Sensasip opis bai lukautim mani bilong ol yet - P3



PNG nidim 'praivet ekwiti fan'Israel redi long helpim PNG

Stanley Nondol i raitim

PAPUA Niugini i nidim bikipela praivet ekwiti fan na yusim ol teknoloji bilong Israel long sapatim bikipela egrikalsa projek long kamapim bikipela bilien kina winmani.

Minista bilong Tred Komes na Industri, Richard Maru i tok PNG gavman i mas mekim tupela samt-

ing long lukim bikipela egrikalsa projek na bikipela bilien winman, i em long; PNG Minista bilong Egrikalsa Tommy Tomscoll i mas go long Israel na sainim MoU bilong Egrikalsa Teknikel Kopresen na gavman i mas kamapim bikipela praivet ekwiti fan long sapatim bikipela trenfomesen projek.

Minista Maru i tok em bai toktok strong wantaim gavman long go

pas long kamapim ekwiti fan long yusim praivet kepitol long wokim bikipela trenfomesen projek olsem egrikalsa na ilektrisiti projek.

Gavman bilong Israel i wanbel long salim ol saveman bilong egrikalsa i kam mekim sampela stadi long kamapim spesel egrikalsa developmen jon long Makam Veli, Baiyer Riva, Ruti long Westen Hailans, Trensgogol long

Madang na Karamui Nomani long Simbu na Wes Sepik. Tasol PNG i mas sainim MoU pastaim.

Taim stadi bilong Israel long PNG i makim ol bikipela egrikalsa projek, PNG bai yusim praivet ekwiti fan long kirapim bikos kantri i no gat wanpela fan long sapatim kain bikipela projek olsem.

I go moa long pes 2



The new Fokker 70 jet service. Faster, higher, smoother.....

Call Toll Free on 180 3444 or contact your nearest Air Niugini Travel Centre or Travel Agent to learn more about our F70 jet service.

Air Niugini
www.airniugini.com.pg

EXCLUSIVE CARRIER FOR THE 2015 PACIFIC GAMES



Presiden bilong Indonesia i kam long PNG

Stanley Nondol i raitim

PRESIDEN bilong Indonesia, Joko Widodo i kam raun long kantri wantaim meri bilong em Iriana, na ol sampela gavman minista. Ol i kam long kantri long dispela wik Mande na i go bek long Tunde bihain long gavman bilong em i sainim tupela agrimen wantaim gavman bilong PNG.

Long Mande Me 11, ol PNG Difens Fos soldia, PNG Polis, Minista bilong Foren Afeas na Tred, Rimbink Pato, Minista bilong Spot Justin Tkatchenko, Deputi Praim Minista na Minista bilong Leba Benjamin Poponawa wantaim ol gavman opisa bilong PNG i bung long Jackson ples balus na kisim presiden Widodo wantaim ol delegesen.

Bihain long praivet jet bilong Indonesia i pundaun, Presiden Widodo i sanap wanatim PNG Difens Fos Komanda, Gilbert Toropo na Polis ben i welkamim Widodo wantaim nesanel entem bilong tupela kantri, Indonesia na PNG wantaim 21 gan salut.

Presiden Widodo wantaim delegesen na PNG delegesen i go long gavman haus long Koneboba na bungim Gavana Jenerel bilong PNG, Michael Ogio.

Na nait bilong em Praim Minista Peter O'Neill na meri bilong Lynda Babao O'Neill wantaim ol gavman



Minista bilong Foren Afeas Rimbink Pato i bungim Presiden Widodo wantaim delegesen long Pot Mosbi Jackson ples balus.

minista na hetman bilong ol gavman dipatmen i bungim Mista Widodo wantaim ol delegesen long palamen na we ol i bin kaikai.

Ol singsing grup bilong PNG i singsing na danis long tok welkam long Presiden Widodo wantaim delegesen bilong em.

Presiden Widodo na Praim Minista O'Neill wantaim i tok Indonesia na PNG em tupela kantri serim boda na tok tupela bai wok bilong long tred, bisnis na ol planti eria bi-

long developmen.

Long tupela de, tupela lida i tok tok long planti samting we tupela kantri bai wok bung long givim sevis long ol pipel.

Sampela toktok tupela lida i tok tok em long stretim boda krosing kopresen namel long Indonesia na PNG eneji prodaksen long oil na ges na wok bilong multi nesanel kraim na strongim wok bilong multi leterel engesmen forum long Melanesen Spiahet Grup (MSG).



Presiden Widodo wantaim meri bilong em Iriana, i sanap long Jackson ples balus taim PNG Polis ben i pairapim nesanel entem bilong Indonesia na PNG..

Praim Minista i tok PNG bai sapotim Indonesia long kamap memba bilong MSG. Na dispela bai helpim 5-pela Melanesien provins long Indonesia bai stap insait long ol wok olsem tred, na invesmen na i ken pilai spot wantaim ol arapela Melanesien kantri.

Mista O'Neill i tok wok bai kamap long strongim tred na bisnis long Indonesia boda olsem grasrut bisnis long SME i go antap long bikipela bisnis.

Presiden Widodo i tok em gat luksave olsem PNG em brata kantri na i serim wanpela boda.

Em i tok wok namel logng tupela gavman bai strong long ol eria tupela gavman i sainim long ol yia i kam.

Mista O'Neill i singaut long Indonesia gavman long lukluk long ol hevi bilong Wes Papua na i tok PNG i sapotim long wanem rot Indonesia gavman i laik mekim long ol pipel bilong Wes Papua.

PNG nidim 'praivet ekwiti fan'

I kam long pes 1...

Ol komesel na arapela bikipela fainenesel kampani i no save putim bikipela invesmen long egrikalsa olsem ekwiti na patna wantaim gavman.

Kantri Israel em pulap long bikipela ples wesana, i no gat wara na ol diwai na bikipela graun. Tasol em i tanim deset kamap fam bilong ol bikipela egrikalsa eksport projek long wol. Na em i mekim moa long 40-bilien long wan wan yia.

Minista bilong Tred, Komesa na Industri Richard Maru wantaim PNG delegesen husat i go long Agri-Tek eksport long Israel i opim ai olsem Israel i tanim deset kamap bikipela egrikalsa Industri long wol na eksportim ol prodak bilong em i go long wol.

Minista Maru i tok Israel i gat

200,000 hekta bilong graun tasol bilong egriklasa tasol i mekim 40,000 long wan wan yia. Sepik planti tasol i gat 400,000 hekta graun. PNG i gat bikipel graun i slip sori na no gat wanpela projek i kamap long helpim ikonomi na ol pipel.

Em i tok long tai mol i go long Israel long las mun, i bin gat gutpela toktok i kamap namel long PNG na gavman bilong Israel. Gavman bilong Israel na ol praivet sekta i soim bikipela laik long helpim PNG long wokim kain kain egrikalsa projek.

"Israel i redi long kam helpim yumi wantaim save, teknoloji na soim yumi rot long wokim ol bikipela projek," Mista Maru i tok.

Minista Maru i tok taim em i toktok wantaim Israel, ol i tokim em olsem PNG i gat bikipela graun, wara, diwai na planti neturel samting stap pinis long graun bilong yumi long mekim ol bikipela projek i kamap isi.

Minista Maru i tok bikipela transfomesen projek long egrikalsa i ken kamap long sapos kantri yusim Teknoloji Israel i yusim long las 60 yia. Israel nau em i namba wan egrikalsa kantri long wol.

"Australia, Nu Silan na planti ol kantri long Afrika i kisim teknoloji helpim long Israel na yumi bai no inap rong long kisim Israel i kam insait long helpim yumi long yusim ol graun na risos long kamap bikipela egrikalsa eksport long wol," Mista Maru i tok.

Indonesia na PNG gavman i sainim tupela MoU

Esther Wani i raitim

PRAIM Minista bilong Papua Niugini, Peter O'Neill wantaim Presiden-bilong Indonesia, Joko Widodo i bung long wanpela miting long Palamen haus long Tunde long wok bung wantaim.

Dispela i kamap kliat taim, Foren Afeas Minista bilong Indonesia, Retno L Marsudi wantaim wan wok bilong em long PNG, Rimbink Pato i sainim namba wan Memorandum o vAndastending (MOU) o agrimen long stopim na rausim trensesenel kraim.

Long wankain taim, Minista Pato wantaim Enejina Minerel Risos Minista bi-

long Indonesia, Sudirman Said i sainim nambatu MOU o agrimen long kopresen long human risos long petroleum na eneji.

Praim Minista O'Neill i tok, "Mipela bai sapotim Indonesia long kamap asosiet memba bilong Melanesia Spiahet Grup (MSG) na mipela i amamas long endosim wantaim ol narapela lida bilong Melanesia Grup."

Em i tok moa olsem dispelabai inapim 5-pela Melanesia provins bilong-mipela olsem Indonesia bai wok bung long kalsa, tred na invesmen wantaim ol Melanesia kantri insait long rijon.

"Indonesia i gat bikipela invesmen long infrastraksa olsem teliko-

minikesen, pawa jeneresen, na rot infrastraksa we mipela laik gat na mipela i gat sans long wokbung wantaim ol Melanesia long narapela sait long boda.

Long wankain taim, Presiden Joko Widodo i tok long 40 aniveseri long rilesensip bilong tupela kantri bai gro strong moa yet.

"Mipela i wanbel long mekim bikipela kopresen long ikonmik sekta long go bikipela moa long tred long boda na strongim kopresen long invesmen na infrastraksa developmen, na tu kamapim patisipesen long praivet sekta long eneji, telikomyunikesen, forestri na fiseri," Presiden Widodo i tok.

Talk more for just K1 a day

Subscribe to our K7 weekly pass. Dial *123*7#.

Contact us now!
 Customer Care 76003555
 support@bmobile.com.pg

Get 7 days
UNLIMITED FREE CALLING
 Between Bmobile-Vodafone numbers

20 MB
 Internet data

10 MIN
 Calls to any network in PNG

20 SMS
 Text to any network in PNG

www.bmobile.com.pg

Sensasip Opis bai lukautim mani bilong ol yet

Frieda Sila Kana i raitim

SENSASIP Opis bilong Papua Niugini nau i go antap wanpela moa level long wok bilong strongim wok bilong ol wantaim nupela Akaunting Sistem bilong ol yet i lukautim wok bilong mani insait long opis bilong ol, na tu ol i go insait stret long nupela fainens sistem bilong PNG gavman (IFMS).

Long Fraide las wik, Minista bilong Komyuniti Dvelopmen, Meri, Yut na Sios, Delilah Gore i mekim opisal luk-save bilong dispela tupela samting, insait long opis bilong Sensasip long BSP Benk long Sentral Waigani, Nesenel Kapital Distrik.

Dispela i min olsem Sensasip Opis nau i gat fainensal indipendens we ol yet i ken prinim ol sek pemen bilong ol na ol i no inap long wet long Fainens Dipatmen o Komyuniti Dvelopmen long mekim bilong ol. Ol bai mekim wok bilong ol hariap tasol long taim bilong ol yet.

Sif Sensa, Steven Mala i tok pastaim long 1989-1990 i kam baset bilong ol em i K300,000 tasol. Nau wantaim gutpela sapot bilong O'Neill-Dion gavman, em i go antap sampela moa level na ol i kisim K3.6 milien baset.

Em i tok ol i amamas long kisim dispela mani tasol em i save tu olsem i gat bikpela asua long lukautim gut na ripot long wanem kain we ol bai yusim ol dispela mani.

Finans Dipatmen Seketeri, Ken Ngangan i bin stap tu na i tok olsem gutpela wok bilong Sif Sensa Mala wantaim ol woklain bilong en i bin mekim wok bilong dispela opis i go moa. Em i amamas long larim Sensasip opis i lukautim mani bilong ol yet, tasol em i tok lukaut long ol i mas bihainim gut sistem. Long wankain taim Mista Ngangan i tok, Fainens i stap sambai tasol long helpim ol sapos ol i painim hatwok.

Minista Delilah Gore i tok wantaim NEC disisen Namba 128/2008, long 2008 i mekim Sensasip Opis long kamap strong na senisim straksa bilong en na givim nupela nem olsem "Sensasip Opis" na i no 'Sensasip Bod'. Em i tok olsem stat long 2009, dispela opis i stat long kamapim Nesenel Sensasip Polisi na bihain wokim Koporet Plen bilong em.

Long 2012 Bod i putim aut tupela bikpela pepa; em Nesenel Sensasip Poils na 5-ya Koporet Plen bilong en. Na long 2013 em i stat long kisim moa wokman na wokmeri. Nau em i gat 24 insait long mak bilong 25 wokman na meri.

"Wantaim olgeta namba bilong ol woklain nau i stap, Opis i kirap long mekim sampela bikpela wok olsem, Lukluk bek long Klasifikesen bilong Pablikesen (Sensasip) Ekt 1989, Fainensal Atonomi na Databes Apgred.

"Liklik taim bihain bai opis i lukim gen nupela lo; Makim ol muvi piksa, Pablikesen na Onlain Sevis Bil 2014, long redi long wanem kain taim yumi stap long en nau," Misis Gore i tok.

Em i tok dispela lo bai bringim bek gutpela tingting na pasin long ol famili na komyuniti bilong yumi bikos em bai givim moa pawa long ol papamama na ol lain husat i lukautim ol pikinini long skulim ol long gutpela pasin.

"Mipela gat bikpela tingting long putim dispela nupela lo long taim Palamen i sindaun gen long dispela mun. Em bai lukluk long hevi bilong ponograpi, stilim ol manmeri long internet, na ol narapela," em i tok.

Sensasip Opis nau i stap long namba wan plua bilong BSP Benk long Sentral Waigani, long Nesenel Kapital Distrik.



L-R) Sif Sensa Steven Mala, Seketeri bilong Fainens, Ken Ngangan, Seketeri bilong Komyuniti Dvelopmen, Anna Solomon, Minista bilong Komyuniti Dvelopmen, Meri, Yut na Sios, Hon. Delilah Gore soim agrimen pepa bilong Sensasip opis bai kisim Integrated Fainensal Sistem bilong lukautim ol mani bilong Sensasip, Ekting Gavman Printa na wanpela senia wokman bilong Sensasip na Masta ov seremoni.

2015 Pacific Games **TICKET GIVEAWAY!**

Simply do a **FUNDS TRANSFER*** via BSP Mobile Banking during **MAY** to be selected. Customers will be contacted directly with details posted on BSP's Social Media.

TRANSFER FUNDS NOW *131#



20 x general admission double passes plus 2 major passes to be given away weekly.

www.bsp.com.pg f t

* Excludes Funds Transfers between own accounts.



Official Sponsor of the 2015 Pacific Games

Baki kisim bek wok bilong polis komisina

GAVMAN i rausim Polis Komisina Geoffrey Vaki na kisim bek komisina bipo, Gary Baki olsem nupela Polis Komisina. Praim Minista Peter O'Neill i tokaut long disisen bilong kabinet na em i tok ol hevi bilong lo na oda i pundaun aninit long lidasip bilong Vaki olsem na gavman i makim gen Baki long kamapim gut pablik sefti. Mista O'Neill i tok dis-

aplin, kontrol na koman bilong polis fos i pundaun na em i mekim tok promis long sapatim nupela Komisina Baki long stretim fos. Em i tok Garry Baki i wanpela man husat i gat bikpela eksperiens long wok bilong polis na em i gat bilip long mekim wok. Em i tok gavman i bilip lo na oda long kantri bai orait aninit long Mista Baki.

Geoffrey Vaki i no mekim wanpela toktok yet long dispela taim. Tasol long 2014 em i no arestim Praim Minista O'Neill taim distrik kot i givim arest oda egensim Mista O'Neill. Mista O'Neill i tok planti hevi bilong lo na oda i kamap na i go antap moa na gavman i mas mekim ol kain disisen long makim nupela man long intres bilong Papua Niugini.

Hickey na Lagea bai bungim Lidasip Traibunel

TUPELA memba moa bai kamap long ai bilong Waigani Nesenel kot long sas bilong korapsen long pablik opis. Memba bilong Bogia John Hickey na memba bilong Kagua Erave, James Lagea bai sanap long ai bilong Lidasip Traibunel. Ombudsmen Komisin bin salim ripot bilong tupela i go long Pablik Prosekuta pinis long dispela yia. Long las wik Fraide, Pablik Prosekuta Pondros Kulawin i

askim Sif Jastis long makim tupela tim bilong Lidasip Traibunel long lukluk long ol toktok egensim tupela lida. Pablik Prosekuta i tok tupela lida wantaim em Obudsmen i salim ripot i kam long opis bilong em long toktok bilong tupela lida i no givim enuel fainensel riten o givim ripot i go long opis bilong Politikal Pati na Kendidet Komisin bihain long tupela i winim 2012 Ne-

senel lleksen. Mista Kaluwin i tok tupela lida i asua long Seksen 89 bilong Ogenik Lo bilong Politikal Pati na Kendidet 2003 taim tupela i no salim riten o ripot i go long Opis bilong Politikal Pati na Kendidet Komisin. Em i tok moa olsem i gat inap evidens long tupela bai bungim Lidasip Traibunel taim em i glasim gut keis bilong tupela.

Pailot i seif long taim balus i pundaun

Wanpela pailot wantaim tupela pasindia i no kisim bagarap taim wanpela wan ensin Sesena balus ol i stap long en i pundaun long Goroka bihain long ensin bilong balus i no wok gut. Nesenel Epot Kopresen Atoriti long Goroka i tok wok painim bai kamap long dispela hevi.

Dispela Sesena wan ensin balus i kirap lusim Goroka na i no longtaim, i gat hevi long ensin na balus i kam pundaun gen long wanpela baret arere long ples balus. Dispela balus i bilong wanpela sekenderi skul na ol i yusim olsem praivet pailot trening skul.

Pailot em i bilong Enga provins na tupela pasendia i bilong lsten Hailans. Ol tripela i go long Goroka haus sik tasol ol i no kisim bagrap na ol i go bek long haus. Nus bilong dispela balus i bagarap.

Presiden bilong Indonesia i kam raun



Presiden bilong Indonesia, Joko Widodo i sanap long ren taim PNG polis benk i pairapim nesenel entem bilong Indonesia.

PRESIDEN bilong Indonesia, Joko Widodo, wantaim meri bilong em Iriana i bin kam raun long PNG long Mande na Tunde long dispela wik. Long dispela tupela de, Presiden Widodo i sainim tupela agrimen wantaim gavman bilong PNG. Praim Minista Peter O'Neill i singaut long Indonesia i sapatim wari bilong Wes Papua long kamap memba bilong MSG kantri na ol pipel i ken go het wantaim bisnis na laip bilong ol. Presiden Widodo i tok PNG i stap klostu long Indonesia na gavman bilong em bai wok poroman wantaim PNG long ol eria bilong divelopmen. Praim Minista O'Neill na Presiden Widodo i sainim agrimen long Oil na Ges wantaim wok bung bilong stopim trensesenel krait.

Chuave distrik ripot bilong DSIP mani

OL distrik na ol provins insait long kantri bai kamap gut stret sapos ol i yusim gut Distrik Sevis Impruvmen Program (DSIP) mani we Nesenel Gavman i givim ol. Dispela toktok i bin kamap long maus bilong Vais Minista bilong Woks na Memba bilong Suave, Wera Mori long taim em i givim ol ripot bilong mani aninit long DSIP na DSG (Distrik Sapot Gren) ol i yusim long 2014, i go long Dipatmen bilong Implementesen na Rurel Divelopmen (DIRD). Mista Mori i tok DSIP program em i bikpela wok bilong putim mani i go long sevis deliveri long ol sosel na ikonmik wok bilong Suave distrik long Simbu Provins. Mista Mori i tok ol i mas kontrolim olgeta mani daunbilo we i klostu long hap wok i kamap long en bilong ol inap yusim gut DSIP mani long mekim gutpela sevis. "Mipela i wokim planti rot projek, skul na ol haus long Suave Haus sik. Planti wok i kamap long ol rot olsem na moa mani i go long rot konstraksen. Em i min olsem sampela mani bilong ol narapela sekta i senis na i go long infrastraksa divelopmen. Rot i opim rot bilong ikonmik divelopmen long ol rurel komyuniti long fomol na infomal bisnis i ken kamap long kamapim gutpela standet," em i tok. I gat sampela liklik na namel sais (SME) bisnis tu i bin kamap long 2014 i go long 2015 na em i kamapim moa kes mani long ol pipel bai gat na bringim bel isi na

wanbel insait long distrik na tu long strongim ol lain bilong lukautim lo wantaim moa mani. Mista Mori putim hevi long BSP benk long sekim tumas ol pemen bilong ol projek na i mekim wok i no go hariap. Dispela i mekim na sevis deliveri i no kamap long taim bilong en stret. "Mipela i laikim olgeta bikpela gavman sevis i mas wok gen na ol pipel bilong mipela i mas gat sampela kain gutpela sindaun long komyuniti bilong ol. Mipela mas stretim olgeta bris long ol rot bai kamap gut long wokim ikonmik projekt," em i tok. Ten milien (K10 milien) distrik mani i no bin i gat strongpela tambu lon ol mani mak bilong sekta program long distrik na i no long wanwan sekta olsem i stap long 4.4 seksen bilong Edministretiv Gaidlainlong karamapim ol prairiti bilong distrik olsem. long PSIP, DSIP na LLGSIPlong ol i putim mani ausait long mak we ol tok orait pinis long en. Ol i brukim long sekta olsem; edministresen em K1 milien, Helt em K2 milien, Edukesen, K2 milien; Ikonmik K2 milien, Lo na Jastis em K milien na Infrastraksa em K3 milien. DIRD Ekting Seketeri Paul Sai'i i tok em i lo aninit long **Pablik Fainens Menesmen Ekt, Fainensel Instraksem 1A/2013 na Edministretiv Gaidlain** long ripot i go long Gavman long mani ol i yusim. Mista Sai'i tok amamas long



Memba bilong Suave na Vais Minista bilong Woks, Wera Mori i givim Suave DSIP 2014 ripot i go long Seketeri bilong DIRD, Paul Sai'i.

Suave distrik long em i mekim gutpela wok bilong DSIP mani projek na program long helpim ol pipel. Distrik i givim tu 2015 baset we ol i wokim long mekim gutpela deliveri bilong sevis long senta olsem

ol rot, bris, skul na helt senta. Em i kamapim gut bisnis ektiviti wantaim SME na kik statim long Siane Hai Skul wantaim wanpela rekot bilong b with a recorbaset bilong K17 milien na moa baset.

Suave em i namba tu distrik bilong Simbu Provins long givim ripot bilong namba 4 kwota ripot insait long kantri na em i namba 4 long kantri long givim ripot bilong 2014 DSIP/DSG akuita ripot.

Ol 22 skul long NCD i kisim kompiuta

**Esther Bralyn Wani
i raitim**

OLSEM 22 skul insait long Nesanel Kapitol Distrik i kisim setifiket bilong apresiesen na 22 kompiuta set long wanem ol i bin stap insait long 39 In-

dependens Yuniti Mas long las yia.

Long dispela, Gavana bilong Nesanel Kapitol Distrik (NCD), Powes Parkop i luksave long ol wantaim ol setifiket na komputa tasol em i no bin kam bikos long sampela narapela wok long las wik Fraide.

Eksektiv Opisa bilong NCD, Terence Moka, i makim maus bilong gavana na i tok olsem gavana i luksave long ol dispela skul long kamapim patnasip wantaim ol skul na developim ol.

Mista Moka i tok ol pipel bilong kantri i mas senis na dispela i save stat long skul.

Long wankain taim, Deputi Siti Menesa, Kila Dick i mekim wankain toktok. Em i tok ol pikinini i gat longpela rot long go het.

Sam Lora, husat i makim mau bilong ol prinsipel, ol tisa na ol sumatin i tok tenkyu long Gavana na opis bilong em long luksave long ol 22 skul.



Eksektiv Opisa bilong NCD, Terence Moka na Deputi Siti Menesa, Kila Dick i sanap long namel wantaim ol het sumatin bilong 22 skul wantaim ol kompiuta set bilong ol.

EMPNG i sapatim developmen bilong PNG wokfos

OPERETA bilong PNG LNG Projek, ExxonMobil PNG (EMPNG) Limitet i amamas long 40 yangpela man na meri ol i kisim ol long namba tri raun bilong ol Operesens na Mentenens Treni long Pot Mosbi.

Ol treni bai statim 9-pela mun trening kos insait long klasrum, long wokim faundesens na besik skil trening long oil na ges, na bihain go het long ol spesel trening long ples we kampani i operet long en.

Ol dispela trening bai helpim ol long kamap Operesens na Mentenens Teknisen.

Bihain long greduesen, ol bai wok long olgeta hap long PNG

LNG projek eria, olsem long Hides Ges Kondisening Plent na LNG Plent tu, na wantaim ol narapela paipain na ol wel.

Operesens Menesa bilong EMPNG, Bruce Page, i tok olsem long kamap olsem Operesens na Mentenens Treni em i sans bai stap oltaim.

"Dispela program, bai givim ol lain i sindaun long en save long mekim wok gut na developim ol teknikel skil long kamapim faundesens long mekim wok go het long kampani na wok bilong ol.

Mipela i amamas long ol treni long pinisim ol dispela trening na mipela i welkamim yupela insait

long ExxonMobil famili," Mista Page i tok.

Wanpela bilong ol 12-pela meri ol i makim long dispela treing, Barbara Kipak, i tok em i driman bilong em long wok wantaim ExxonMobil.

"Mi amamas olsem ol i makim mi long dispela program, mi save bai i gat planti wok na samting bilong lainim, tasol mi weit na redi long stat," Barbara i tok.

EMPNG i bin kisim namba wan grup bilong Operesens na Mentenens Treni long 2010 wantaim 59 treni na 76 treni long 2012 husat i bin pinisim dispela trening program.



Barbara Kipa, wanpela bilong ol treni wantaim papa na mama bilong em.

Keis bilong Ok Tedi i no go long Kot

INTANESANEL Kot bilong Setelmen long ol Invesmen Disput (ICSID) i no inap harim kleim bilong PNG Sastenebel Developmen Program (PNGSDP) Limitet egensim gavman bilong PNG long wanpela disisen ol i mekim long Me 6, long dispela yia.

ICSID tasol i bin mekim disisen long dispela keis, long wanem PNGSDP i laikim bek 63.4 pesen bilong Ok Tedi Mining Ltd we gavman i no bin yusim aninit long lo long Septemba 2013.

Siaman bilong PNGSDP, Sir Mekere Morauta, i tok olsem kampani i painim ol narapela rot i op.

"Kampani i no amamas olsem ICSID i no laik harim keis. Tasol i gat ol narapela ligel hap i op long mipela na mipela i toktok long dispela pinis," Sir Morauta i tok. Em i tok olsem edvais bilong ol

i olsem aninit long PNG na intanesanel lo, ol mas baim kompensesen.

Sir Morauta i tok olsem ol dairekta na menesmen bilong PNGSDP i gat ligel na moral wok long lukautim ol aset na mani bilong kampani na dispela ol bai mekim. Em i tok moa olsem ol bai i go het long lukautim Long Tem Fan na straksa, independens na integriti bilong PNGSDP.

"Long mekim olsem, kampani i bilip olsem ol i mekim long intres bilong ol pipel long Westen provins husat i bin benefit long ol sosel na ikonmik developmen program bilong PNGSDP long 12 krismas na bai go het long benefit long 40 krismas," Sir Morauta i tok.

Kot keis bilong PNGSDP egensim gavman long Hai Kot bilong Singapore i go het.

Seeking for Sponsor

I am Joshua Koi from WHP in Tambul District.

I completed my certificate in telecommunication systems at Telikom Training College in 2009. In 2013 I graduate at the National Polytechnic Institute of PNG with Diploma in Electrical Engineering Power in Lae. Currently I am attached with PNG Power Ltd as a casual in the Rural Electrification for two years now (2014-2015).

I have the interest to further my studies and applied at the University of Southern Queensland to do my Bachelor in Electrical Engineering (Honours). My application was successful and I got the offer letter to commence my study in Feb 2016 but I cannot meet the cost. Therefore, I'm seeking sponsorship to support me in my studies. If you are willing to help you can contact me on 70990044 or 73726551 or on my email joshuackoi@gmail.com.

Saveman bilong TB i lukluk long Drag Resisten TB long PNG

WANPELA lain saveman dokta bilong sik tubekulosis o TB aninit long wok bilong Grin Lait Komiti (GLC) i kam long Papua Niugin long dispela mun long lukluk gen long multi-drag resisten TB tritmen na menesmen program long kantri.

Multi-drag resisten TB em i nem bilong dispela nupela kain TB we i kamap bikpela tru long Westen Provins na liklik hap long NCD. Dispela nem ol saveman bilong TB i givim long binatang bilong TB we i save bikhet long ol marasin bilong TB, bilong wanem ol lain i kisim sik TB pastaim i no pinisim gut marasin bilong ol. Taim dispela sik i kisim ol gen, ol binatang i kamap strong na winim ol soldia bilong bodi olsem na ol i no indai hariap wantaim ol TB marasin.

Oi intenesenel GLC saveman i kamap long Papua Niugini long Sande bihainim singaut bilong Nesenel Dipatmen bilong Helt, long lukluk gen long painim ol rot bilong menesmen bilong drag-resisten TB na long em i go insait long helt sistem long kantri.

Wol Helt Ogenaisesen (WHO) i save helpim ol kantri long menesim multi-drag-resisten TB (MDR-TB) aninit long Grin Lait Komiti (GLC) wok. GLC Inisiativ em i bung bilong GLC Komiti wantaim WHO/GLC Seketeriet, Global Drag Fasiliti na ol patna husat i save givim mani na teknikal sapat.

Sampela lain bilong ol i bin go long Daru, Westen Provins na lukluk raun long Daru helt kea haus sik na ol nara-

Ples man i tok tenkyu long OTML long laip bilong em



Mista Golobe i sindaun long haus sik bet bilong en long Tabubil. Papa bilong en i sindaun long baksait bilong en.

pela i go long ol narapela helt kea fasitili long Nesenel Kapitel Distrik (NCD).

Oi i lukluk gen long draf gaidlain bilong Nesenel Program Menesmen bilong Drag-Resisten TB na bai ol i tok save long Helt Dipatmen long disainim wanpela standet tritmen rejimen o we bilong givim marasin bilong MDR-TB bihainim sevei ol i bin mekim long PNG ino longtaim i go pinis.



Dokta James van den Broek (Iephan), KNCV Tubekulosis Faundesen, The Netherlands, na Dokta Nobuyuki Niishikiori, WHO Westen Pasifik Rijn TB Kodineta harim toktok bilong Profesa Lee Reichman (sindaun namel) i kam long New Jersey Medikal Skul, Global TB Institiut, USA, long taim bilong toktok long MDR/XDR Imejensi Rispons Tim Miting. Foto: WHO/Steven Busin.

WANPELA man i gat 31 krismas bilong Sturt Ailan long Saut Flai Riva, Westen Provins i autim bikpela tenkyu long Ok Tedi Maining Limited (OTML) long sevim laip bilong em.

OTML helikopta i bin sevim Keme Golobe long 23 Epril bihain long wanpela poisin snek i bin kaikai em.

Mista Golobe i bin wokim kanu bilong em i stap taim snek i kaikai em na bihain liklik em i pilim ai raun na klostu em i laik pundaun hap indai stret taim OTML helikopta i kamap.

Dispela helikopta i wok long bringim ol wokman long inspekim wok bilong appret long wanpela Flai Riva jeti. Ol kru bilong helikopta bilong OTML tim hariap tasol kisim Mista Golobe i go long Tabubil we em i kisim helpim long ol haus sik woklain.

Em i kisim marasin bilong kilim poisin bilong snek poisin na ol i putim em long drip na samtimg bilong pulim win gut. Em i kirap gen na kisim tingting bihain long 7-pela aua.

"Mi tok tenkyu long God long em i kam insait na sevim laip bilong mi. dispela em i testimoni bilong mi," Mista Golobe i tok.

Papa bilong Golobe, Upalu tu i tok tenkyu long OTML, wantaim ol wokman na wokmeri bilong haus sik na long ol kru bilong helikopta long sevim laip bilong pikinini man bilong en.

"Em i wanpela mirakel long pikinini bilong bai i dai tasol em stap laip tude," Upalu i tok.

OTML i kisim papa na pikinini wantaim i go long Sturt Ailan.

Olgeta wan wan yia, OTML i save mekim planti medical ivakuesen insait long Westen Provins. Long yia i go pinis kampani i bin wokim 37 medical ivakuesen na long dispela yia tenpela medical ivakuesen olgeta i bin kamap pinis.



Papua Niugini NESENEL AIDENTITI PROJEK



Oi emu namo totona, Nesinol ID oi abia



- ▶ Oi do ia durua bema banika dekenai akaunt ta oi kehoa neganai.
- ▶ Tau ta oi emu aidentiti ia henaoa lasi bong oi emu sivarai danu.
- ▶ Metau lasi bona hekwakwahanai ta lasi banika gaukara lalonai bona bisnis orea danu.
- ▶ Do ia durumu abitoreai oi karaia banika dekenai oi emu bisnis totona bona gaukara haida danu.

"oi rejista hari bona oi noho lalonai"

Nesenal Plening Dipatment
ese hereva ia mailaia



Banika gaukara



Nupela sapat long ol lain i kisim hevi long famili na seksuel

WANPELA nupela famili sapat senta bilong ol lain husat i kisim bagarap long pasin bilong famili na seksuel vailens long lsten Hailans i op long Goroka.

Australia Gavman i sapatim lsten Hailans Provinsal Helt Atoriti long kirapim famili sapat senta wantaim K650,000.

Australia Deputi Hai Komisina long Papua Niugini, Mis Bronte Moules na ol provinsal lida i opim dispela senta long las wik. Australia i putim mani long kirapim dispela senta na em i stap insait long hap bilong Goroka Base Haus sik na em bai givim helpim long kea na kaunseling

long ol lain i kisim hevi long famili na seksuel vailens. Ol wok manmeri bilong lsten Hailans Provinsal Helt Atoriti Famili Sapat na ol patna ogenaisesen, Provinsal Famili na Seksuel Vailens Eksen Komiti bai wok wantaim long givim ol sevis na long kamapim sefti long komyuniti.

Mis Moules i tok: "Famili na seksuel vailens em i brukim wanpela lo na em i save bagrapim planti milien meri na ol pikinini insait long wol. Long Australia wankain long Papua Niugini.

Ol dispela pasin bilong brukim lo em i save hait na ol i no save givim ripot

long ol lo lain. Vailen i save brukim famili na komyuniti na em i save stopim ikononik developmen.

"Vailens long ol meri na pikinini em i wanpela hevi we yumi ken dau-nim wantaim strongpela lidasip we bai inap long senisim pasin na tingting bilong stopim vailens na long banisim ol lain husat i kamaut long dispela kain hevi, taim ol lain i brukim lo i go long kot," Mis Moules i tok.

Em i tok ol helt senta insait long ol komyuniti i stap longwe long ol rurel ples olsem i mas bringim ol lain i kisim hevi wantaim ol lain i mekim rong long famili sapat senta long kisim ol sevis.



Australia Deputi Hai Komisina long Papua Niugini, Mis Bronte Moules katim ribon bilong famili sapat senta.

Australia volantia helpim ol ples lain long kamapim gut lokal maket

WANPELA meri volantia bilong Australia, Sue McCuaig husat i stap aninit long De'arne Kershler, wanpela Australia Volantia bilong Intenesenel Developmen (AVID) i wok long ranim ol trening woksop long Nu Ailan, long helpim ol lokal meri na man long mekim moa mani wantaim ol bilas maket bilong ol.

Mis McCuaig i wok wantaim projek bilong Australia Senta bilong Intenesenel Egrikalsa (ACIAR) bilong strongim wok bilong pel indastri long Westen Pasifik, na em i ranim woksop long helpim 35 atisen long Nu Ailan Provins long kamapim gutpela sindaun na long gat kaikai olgeta taim.

Trening em bilong hendikraf na ol i yusim bikpela sel bilong pel long wokim ol nekles, yau ring na ol narapela bilas bilong bodi. Em i holim woksop long Nusalik komyuniti we ol sampela man na ol meri i kisim save long nupela stail bilong wokim bilas na long kamapim maket bilong ol yet.

Mis McCuaig i holim pinis ol woksop long ol ailan bilong Nusalik na Nago na em i yusim ol samting bi-



Sue McCuaig i stap long woksop wantaim ol meri atisen long ples Panakonda long Nusalik Ailan. Hencie Eliuda smail long soim amamas bilong em taim Sue i toktok nais long bilas em i wokim.

long trening i kam long Australia Hai Komisena.

Helpim bilong Mis McCuaig i mekim ol atisen na planti bilong ol i

meri, long lainim nupela we na stail bilong kamapim moa mani long samting ol yet i save mekim pinis.

Ol i gat sans long kisim mani long

taim ol i salim ol bilas samting long ol turis na ol narapela lain. Bilong wanem ol i lainim tu we bilong mekim ol man i aigris long samting

ol i wokim na putim long maket.

"Samting ol i save pinis long mekim bikos bipo yet ol i save mekim. Tasol ol nupela stail i opim ai bilong ol na givim moa tingting long ol i ken mekim moa. Mi helpim ol long dispela we," Mis McCuaig i tok.

Lucy Victor, husat i bin stap long woksop long ples Panakonda long Nusalik Ailan, i tok, "Dispela trening em i gutpela bikos em i soim mi save na nupela stail bilong mekim samting we mi no bin save long en bipo."

Wanpela man atisen William Kepas i tok, "Bipo mipela i save pulim pis, salim na kisim mani tasol nau mipela i lainim hendikraf bisnis na em i helpim mipela long baim skul fi bilong pikinini na ol narapela samting mipela i laikim. Planti moa lain i baim ol samting bilong mipela."

Mis McCuaig i holim wanpela disain resis long makim tripela lain husat i mekim gut stret long ailan, na tu em i putim wanpela maket bilong ol lokal atisen long Kavieng Hotel long soim ol stail bilong ol.

Ol pipel i no stap long ilektoral rol i ken vot

OL Bogenvil pipel husat nem bilong em i no stap long ilektoral rol long 2015 ABG Jenerel Ilek-sen i gat sans long vot.

Eking Bogenvil Ilekto-ral Komisina, George Manu, i tok klia long dispela bihain long ol ripot olsem planti ol lain i laik vot tasol ol i rausim ol bikos nem bilong ol i no stap long ilektoral rol.

"Mi kisim ol ripot olsem sampela pipel nem bilong ol i no stap long rol. Dispela em bikpela samting," Mista Manu i tok.

Em i tok, "Opis bilong mi i luk-luk long dispela olsem namba wan samting na mipela i kamap

wantaim rot long putim ol nem go insait, aninit long lejislesen wanpela lain i mas vot."

Em i tok save olsem husat nem bilong em i no stap long rol long wanpela poling ples i mas go long Bogenvil insait Bogenvil (BiB) Spesel Voting ples long sekim nem i bin stap pastaim o no gat. Em i tok sapos nem i stap long ol pastaim rot, ol i mas vot long BiB Spesel Voting ples.

"Tasol sapos nem i no stap, aninit long lo ol pipel i no gat nem long rol i no inap vot," Mista Manu i tok.

Ol 3-pela BiB Spesel Voting ples i stap long Bel Isi Pak long Buka, Sentral rijinol ileksen

kodinesen opis long Arawa taun na Sauten rijinol ileksen kodinesen opis long i stap insait long Buin Distrik opis.

Long wankain taim, em i tok save long ol pipel long Bogenvil husat i gat nem long ilektoral rol long vot bikos em i rait na responsibiliti bilong ol.

"Em i rait long makim lida na wanpela responsibiliti long makim gut husat yu laik votim na no ken bagarapim disisen bilong narapela long vot," em i tok.

Mista Manu i toksave long ol pipel bai vot long lukim gut ol poling skesuel bai ol i noken mis aut.



Wanpela man i putim vot pepa bilong em go insait long boks taim em i vot long dispela Mande.

Ol SVD i lusim wanpela pater na saveman

OL Divain Wod Misineri (SVD) long PNG i lusim wanpela gutpela pater na saveman.



Fr. Robert Plews Laka SVD

Pater Robert Plews Laka SVD i gat 43 kris-mas bilong Sari Peris long Enga provins i bin dai long las wik Sarere long SVD Haus long Hagen bi-hain em i gat hevi long lewa bilong em na i pun-daun.
Ol SVD Misineri na ol woklain bilong DWU i sori stret na tokaut long dai bi-long Pater Robert SVD.
Pater Robert i bin mekim wok pater long 13 krismas long Bogia, Madang provins bipo em i go wok long DWU olsem wanpela leksera long Di-velopmen Komyunikesen.
Em i bin wok tu long eria bilong fomesen bi-long ol sumatin long laip na skul bilong ol.
Em i bin skul long PNG

na Filipins.
Long tumora Fraide moning 10 klok moning, ol bai wokim funere Misa lotu bilong em long Rebi-amul haus lotu long Hagen, na long Sarere Me 16 long 10 klok moning, ol bai wokim gen Misa lotu long Par Peris long Enga provins na bi-hain, planin em.
"Husat i laikim mi bai harim Tok bilong mi, na Papa bilong mi bai laikim em, na bai mipela i kam long em." (John 14:23)

Laulu na Windsbach Patnasip long wok misin kamap strong

Sanang Zazing i raitim

FOAPELA lida manmeri bilong Luteran Sios Laulu Seket, ELCPNG Yabem distrikt, nau i stap long kantri Jemeni aninit long wanpela patnasip program namel long Luteran Sios Laulu seket na Luteran Sios Windsbach seket insait long Bavaria, Jemeni.

Ol i bin lusim Papua Niugini long Epril 23, 2015.

Nem bilong ol em Jack Nadom, Luke Simon, Christina Timbeng na Alaba Keputung.

Dispela visit o wokabaut i go long Jemeni i bihainim Patnasip In Misin program namel long Luteran Sios Laulu seket na Luteran Sios Windsbach seket.

Siaman bilong Patnasip In Misin, Daniel Kigasung i tok, dispela wokabaut bai strongim 25 yia bilong wok patnasip insait long Gutnius namel long tupela seket, stat yet long 1984.

Insait long Jemeni, ol bai wok bung wantaim na harim Tok bilong God, bung wantaim long mekim prea, wokim drama na danis, raun lukim ol yut grup wantaim mama grup, na lotu wantaim ol Sande skul pikinini.

Dispela i go wantaim wok bilong evan-jelaisesen namel long tupela Luteran seket.

Insait long dispela patnasip, tupela seket bai bung long wok lidasip na devel-opmen long wok bilong ol yut na Sande Skul Ministri, Ministri bilong Wokmeri, na Wok Edministresen, na wok insait long opis namel long tupela seket.

Mista Kigasung i tok, wokabaut bilong dispela yia ol i givim wok i go long ol Yut na Sande Skul Ministri long mekim wok-



Piksa i soim ol Laulu Seket patnasip grup sapota na delegesen stat long hankais em Jack Nadom, Luke Simon, Christina Timbeng na Alaba Keputung. *Poto: Sanang Sazoring*

about i go long Windsbach seket.

Program bilong wokabau bilong ol 4-pela memba em, ol bai bung wantaim ol yut grup bilong Windsbach, prisenenim drama pilai, mekim musik na singsing, lotu wantaim na lukim ol famili long hap, lukim ol pikinini i gat hevi long bodi (dis-abilities), na ol bai luksave long pasin na lotu bilong ol Muslim.

Ol bai lukluk raun long Rothenburg historikel ples, lukim na harim Windsbach kwaia bilong ol boi, lukim trampet musik kwaia grup na lukluk raun long ol faktori insait long Bavaria.
Long 17 Me, 2015, bai gat bikipela se-lebresen na amamas bilong patnasip pro-gram bai kamap long Windsbach,

Jemeni, na long wankain taim, Laulu seket bai holim selebresen na lotu bilong em hia.

Long taim bilong selebresen na lotu bi-long ol, tupela seket wantaim bai kamapim prea long helpim wanpela na arapela long sapotim wok misin bilong tu-pela long nau na bihain.
Wanpela bikipela samting bilong ol Laulu grup em; ol bai lukluk raun long ples bilong Rifoma, Dokta Martin Luther long Wittenberg taun, na stap insait long yut kemp long biksiti Munich.
Tasol ol i no lus tingting long namba wan wok bilong ol em long wok bilong yut na Sande skul program bilong tupela Luteran Seket.

Histori bilong misin insait long patnasip namel long Laulu Luteran Sios na Winds-bach Luteran Sios i bin stat long 1984, tasol program tru tru em ol i bin statim long 1990.

Visit i bin kamap namel long tupela sios em long yia 1990, yia 1994, yia 1999 na yia 2015. Mista Kigasung i tok, mani ol bai kamapim long dispela yia ol bai salim i go long patna bilong ol long sapotim lotu na ektiviti program bilong ol.

Em i tok, ofa mani ol bai kamapim long selebresen bilong dispela yia, ol bai putim bilong kirapim Laulu seket stesin, haus na opis na risos senta long karim aut wok edministresen bilong seket long helpim 5-pela peris bilong Laulu seket.

"Windsbach seket i bin helpim mipela long kamap long mak na plen bilong seket bilong mipela. Ol i helpim mipela na greduetim tupela pasto long Martin Luther Seminari insait long Lae, 4-pela studen i bin greduet long Banz Luteran Sios Koles, wanpela i greduet long Amron Evanjelis Trening skul long Madang, na 4-pela meri i greduet long Stang Gels Skul. Mipela i amamas olsem 2-pela student bai greduet long Logaweng Seminari long dispela yia na 2-pela studen bai gre-duet long 2016," em i tok.

Ol 5-pela peris insait long ELCPNG Laulu Seket em; Mesen, Situm, St. Solomons, Apo na Wagang peris.
Laulu seket i gat 20 kongregesen we i kisim helpim insait long dispela wok bi-long Patnasip In Misin Program namel long Laulu na Windsbach.
Ol 4-pela memba tim bilong Laulu seket bai lusim Jemeni na kam bek long Papua Niugini long pinis bilong dispela mun.

Yut konvensen bilong ol Gutnius Kristen

BIKPELA pasin bilong bung wantaim, amamas, singsing, wosip, na lotu i bin kamap na kukim stret Is Goroka Praimeri Skul long Isten Hailans taim ol yut bilong Gutnius Kristen Sios i bin kamapim namba wan Isten Hailans Divisenel Yut Konvensen.

Bung i bin kamap long las mun. Yut kodineta na man husat i go pas long kon-vensen, Pasto Michael Fiove i tok Sios i kamapim dispela bung long strongim ol yut bilong Gutnius Kristen Sios long provins, na tu long strongim wok bilong ol insait long sios.

Em i amamas long luksave tu olsem ol yut, i no long Gut Nius Kristen sios tasol, ol arapela yut long ol arapela sios tu wantaim ol yut long strit tu i bin kamap long dispela konvensen.

Pasta Fiove i tok ol i no kam long Isten Hailans tasol, ol i kam long Pot Mosbi (NCD), Nipa long Sauten Hailans long go insait long dispela bikipela konvensen.

"Dispela em i namba wan taim long Gutnius Kristen Sios long kamapim dis-pela konvensen long Goroka long Isten Hailans na bihain kain bung bai kamap long Kimbe long Wes Nu Briten, Pot Mosbi (NCD) na Nipa long Sauten Hailans," Pasto Fiove i tok.

Pasta Ivenjelis Peter Harut husat em dairekta bilong Prayer Friends Office & Israel Ministri long Gutnius Kristen Sios i bin kamap na i go pas olsem opisel ges spika long dispela konvensen.

- Sape Metta i raitim

Sen Mathew Luteran Peris wokim tenks giving

Paulus Tali i raitim

SEN Mathew Luteran Peris bi-long Evanjelikel Luteran Sios (ELC/PNG) long Goroka Distrik i bin stat long 1960s na i kam inap nau, em i save kamapim planti sios wok.

Planti Kristen i save kam long kain kain hap bilong distrik na lotu long lipitimapim nem bilong Bikipela God Jisas bikipela bi-long yumi.

Ol Luteran sumatin bilong Yu-nivesiti long Goroka i save go lotu long Sen Mathew.

Long wik i go pinis Sen Mathew Peris i bin wokim wan-pela tenks giving long sapotim sios wok program, na bringim gutpela wokabaut bilong peris na seket insait long Goroka Dis-trik.

Ol Kristen bilong Sen Mathew i stap long Not Goroka bilong helpim ol long tingim laip bilong ol long lotu, na givim biknem long bikipela Jisas.

Pasto Jack Urame bilong Melanesian Institute bin autim tok bilong God na salensim ol Kristen long pasin bilong giving long ol program bilong sios.

Pasto Urame i tok taim yumi ol Kristen i laik givim samting long sapotim ministri, yumi no ken givim wantaim tubel.

"Yumi mas oltaim givim wan-taim wanbel i go long ol kain kain program bilong sios.

Sapos givim wantaim tubel, bai kaikai yumi givim bai samting nating long ai bilong God.

"Kain program i kamap i bi-long sapotim ol projek bilong sios long skruim ministri bai karim

kaikai bilong wok nau na bihain," Pasto Urame i bin tok.

Pasto Urame i tok Kristen bilip yumi wan wan i gat i mas sapo-tim tru long bel na tingting yumi gat long em, na kaikai bilong givim bilong yumi inap kisim moa blesing.

Moa long 1, 500 Kristen i bin kamap long soim olsem ol bai strongim bilip ol i gat, na strongim wok gutnius long program.

Ol yut bilong peris bin givim moa taim long mekim musik na amasim nem bilong bikipela Jisas i King bilong nau na oltaim.

Pasto bilong peris Reveren An-thony Eleyu i bin tok as tingting em long ol Kristen i ken helpim ol wok bilong peris olsem trans-pot, toilet na ples waswas, banis, Sande Skul haus na ek-sten bilong Sande Skul haus.
"Longpela taim sios i no gat senis olsem mipela laik kamapim kain kain program long senisim lukluk bilong sios. Ol Kristen i ken lukim na sapotim ran bilong Sen Mathew," reveren Anthony i tok.

Peris Siaman, Joe Gare i tok planti Kristen kam long lotu i mas givim ofa wantaim wanbel long sapotim ol wok program we yumi ken lukim blesing long laip bilong yumi.

Projek siaman, Mr. Amos Pokonem i bin tok tenkyu long kamap bilong ol Kristen na soim moa amamas i go long God na i tok bikipela samting long trans-pot em bai mekim isi long kisim ol Kristen kam long lotu na lip-

timapim nem bilong God.

Em i tok kar i ken helpim ol sios lain i go long lukim ol kal-abus lain long Bihute Haus Kal-abus, i go long haus sik long lukim ol sikman meri, na i go aut wok misin.

Ol Yunivesiti ov Goroka sumatin na ol arapela ges we kamap long dispela lotu bung giving ofa inap long manimak olsem moa long K12,000.

Ol yut bin amamas na paitim gita sing sing long givim biknem long God Bikipela na ol Kristen long wan wan distrik i putim ofa.

Seket Presiden, Brian Konigi i bin tok kain pasin long sapotim program bilong sios long wanbel i go long God em i bikipela samt-ing na bai God i blesim han bi-long husat givim ofa.

Pasto bilong Sen Mathew em Poka Willie i tok em i amamas long kain wanbel pasin bilong sapotim sios em i gutpela.

Em i bin tok long kain rot olsem, bai ol Kristen i kam moa na lusim ol kain kain pasin i no gutpela na tingim Kristen bilip ol i gat long em.

Projek Siaman, em Amos Pokone i bin tenkyu long ol man-meri na ol ges husat i kamap na sapotim sios ministri.

Em i tok em taim bilong wok-abaut bilong sios i mas go wan-taim wanbel na lukim senis long sios, komyuniti na ol wan wan eria yumi stap long em.

Refugees em ol lain husat ikisim bagarap na bikipela hevi long ples na kantri bilong ol. Ol ino nap long abrusim dispel ol birua long asples bilong ol na ol ironawe painim gutpela sindaun long narapela kantri.

REFUGEEES

LAIKIM HALIVIM BILONG YUMI

PNG ken halivim ol refugees long painim gutpela sindaun wankain olsem ol narapela kantri imekim.

Toksave ikam long Gavman bilong Papua New Guinea.



Nem: Joseph Ngiugen
Asples: Vietnam
Wok: Fish Processing Worker

Stori bilong tumbuna

Tupela maunten kisim nem

Long bipo tru, wanpela lapun man wantaim tupela pikinini bilong em ol i stap long ples ol i kolim Mungaro.

Nem bilong lapun man em i Gilwe. Nem bilong tupela pikinini bilong em, Yapai na Wayapa.

Tripela man hia i gat wan wan bikpela dok bilong ol yet. Ol i save planim kain kain kaikai na ol abus tu i pulap oltaim, na ol i stop amamas tasol.

Wanpela de lapun papa i tokim tupela pikinini olsem, tumora bai yumi go long bus na katim ol bikbus bilong wokim gaden. Tupela pikinini i orait long tok bilong papa na ol i slip.

Long moning taim tru ol i kirap, pulmapim ol kaukau long bilum na go katim bikbus i stap.

Namel long ples ol i klaim i gat wanpela bikpela diwai i stap.

Tupela brata i kalap long dispela diwai long katim ol han bilong diwai i kam daun.

Tupela i stap antap tru na i lukim wanpela bikpela smok i kamap long haus bilong ol. Tupela i tokim papa; Ating haus bilong yumi i paia, bikpela smok i kamap long haus bilong yumi. Tupela i kam daun kwik na ol i sut i go long haus.

Taim ol i go klostu long haus, papa i tokim tupela; yutupela i wet na mi mas go na lukim husat i stap long haus.

Gilwe i go kamap long haus na i lukim wanpela lapun man i stap nem bilong em Yalibu, i kam long Westen Hailans. Em i askim Yalibu, kandra yu kam mekim wanem?

Yalibu i tok; ples bilong mi i gat bikpela singsing na mi kam kisim tupela pikinini bilong yu.

Tupela i ken singsing pastaim na bihain mi ken bringim tupela i kam bek long yu. Gilwe i tok; tasol mi no gat wanpela pikinini. Yu no ken giaman long mi, Yalibu i tok. Mi bin lukim tripela bet long haus bilong yu.

Gilwe i sem na tok, orait yu ken kisim tupela i go tasol taim singsing i pinis yu mas kisim tupela i kam bek long mi.

Gilwe i tokim tupela pikinini i kam long haus na tupela i ken go long singsing.

Tupela brata i putim ol smatpela bilas na ol kumul tu long het na i go wantaim lapun Yalibu long ples bilong em.

Taim ol i go kamap long ples na tupela i lukim i no gat wanpela singsing i kamap, Yalibu i giaman long tupela.

Yalibu i putim tupela brata wantaim tupela dok bilong tupela long wanpela bikpela hul.

Long dispela hul i gat ol arapela man tu i stap na Yalibu i save kaikai ol wan wan.

I no gat tru rot bilong kam ausait tasol tupela dok bilong Yapai na Wayapa i strong na kam ausait long hul.

Tupela dok i painim wanpela bikpela rop na givim long tupela brata na pulim tupela i kam ausait.

Tupela i kam ausait pinis, i pulim ol arapela man tu i kam ausait.

Nau tupela brata i ranawe long papa bilong tupela. Tasol lapun Yalibu i ranim yet tupela long kilim na kaikaim ol. Tupela i ran na kam klostu long ples na tupela i singaut long papa bilong tupela.

Lapun Gilwe i harim na pulim kwik spia na ston tamiok na kam bungim Yalibu long rot na mekim save tru long Yalibu. Tasol Yalibu i strong yet na olgeta i bungim em inap Yalibu i dai.

Raun wantaim Wantok kru ...

QANTAS 'JOEY KLAP' bilong ol yangpela Frikwen Flaia

OL yangpela lain i flai wantaim Qantas bai amamas long lukim planti kain gutpela samting taim ol i flai long Qantas balus aninit long nupela "Joey Klap" ol i bin opim long dispela mun.

Wiggles, wanpela danis grup bilong mekim ol pikinini amamas i wok bung wantaim Qantas long mekim bikpela tok save olsem long nupela 'Joey Klap' wantaim sampela singsing na danis bilong ol.

Dispela program bilong Qantas' i luksave long ol liklik kastoma na i laik mekim raun bilong ol long Qantas i kamap samting ol wantaim ol famili bilong ol i ken tingim yet long bihain.

Qantas Grup Eksekutiv, Bren, Maketing na Kopret Afeas, Olivia Wirth i tok em i naispela ekspriens long ol pikinini i wokabaut raun taim ol i liklik yet, olsem na Qantas balus kampani laikim olsem ol i mas pilim amamas long raun long balus wantaim ol famili.

"Qantas i laik lukautim gut ol gutpela kastoma bilong mipela, ol liklik kastoma tu wantaim. Mipela i gat pinis sampela we bilong lukautim ol liklik pikinini tasol wantaim Joey Klap em mipela i go long narapela level moa wantaim ol program bilong mekim ol pikinini i amamas long flai long Qantas," em i tok.

"Planti ol pailot bilong mipela, ol ensinia na kebin kru i save makim kos long eviesen bihain long ol i flai long Qantas olsem na mipela i laik long kisim tingting bilong ol yangpela lain moa olsem ol kastoma na wokman na wokmeri long bihain," em i tok.

Joey Klap i save mekim ol dispela samting:

Qantas Joey Club novelti paspot bilong ol nupela lain Frikwen Flaia husat i save stap long Australia (krismas 3-10) we ol inap rekodim ol flait bilong ol.

Spesol kaikai bilong ol pikinini tasol bai stap long ol domestik launs o ples bilong wetim balus. Em bai gat senwis (bret wantaim abus) long piksa bilong ol enimal, nupela prut na sneks olsem popkon na saltanas.

Bikpela mani i go long entatenmen bilong ol pikinini insait long balus we ol i ken swisim televisen i go long kain kain tv sanel. I gat ol muvi bilong ol pikinini inap long 21 aua olsem ol nupela muvi stret olsem Frozen 2 na ol TV sanel wantaim 28 aua TV so wantaim 'Wiggles' na 'Peppa Pik'.

Long ples Yalibu i dai long en, Maunten Yalibu i kamap na bihain ol i planim bodi bilong Gilwe em Maunten Gilwe i kamap. Nau yu ken lukim tupela maunten i stap na dok bilong Gilwe i stap olsem weldok long Mt. Gilwe.

Em i stori bilong Mt. Yalibu na Mt. Gilwe i kamap olsem wanem.

Cornelius Koya, Erave, S.H.D.



Wiggles wantaim ol yangpela frikwen flaia bilong Qantas


TOKSAVE:

WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail unit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C-Word Publishing Company, P O Box 1982, BOROKO, NCD, PNG* o email edres: editorial@wantok.com.pg Telepon namba: 3252500.

Tenkyu

Em nau! Ol pikinini i ken painim rot i go long ples wantaim Wantok kru...

Sudoku



8				7			2	
					8	3		5
	4	5		2		7		
1	7		2		4			
2		9				5		1
			1		9		8	7
		4		9		6	5	
9		6	5					
	1			4				9


						9	5	
		5	9	1				6
3	8				5			
5		6	4	3				
	1	8				3	4	
				8	2	6		5
			3				1	4
8				4	7	5		
	5	2						

Ansa bilong Sudoku # 101 na # 102 neks isu


7	4	3	8	9	1	5	2	6
1	5	8	2	6	4	3	7	9
2	9	6	7	5	3	8	1	4
3	1	7	4	2	5	9	6	8
6	2	4	3	8	9	7	5	1
5	8	9	6	1	7	4	3	2
4	6	2	5	7	8	1	9	3
8	7	1	9	3	2	6	4	5
9	3	5	1	4	6	2	8	7

4	5	7	8	2	6	3	1	9
3	2	1	7	4	9	8	5	6
6	8	9	1	5	3	4	2	7
9	1	8	6	3	7	2	4	5
2	6	5	9	1	4	7	3	8
7	3	4	5	8	2	6	9	1
1	7	2	3	9	8	5	6	4
8	9	3	4	6	5	1	7	2
5	4	6	2	7	1	9	8	3

Ansa bilong las wik Sudoku # 99 na # 100



EM ORAIT




EM NOGUT

Ol wod lista hia:

- ADVAISA
- AFTARIM
- BAGA
- BAINAT
- BAKET
- DAIMAN
- DASTAWE
- EDUKESEN
- FAKTORI
- GORGOR
- GRASOPA
- HAI SAP
- HANDET
- INAPIM
- JENERAL
- KAKALAK
- KOKOROS
- LAIN
- LEPHAN
- MAIMAI
- MALUMALU
- NAIT
- NAMELMAN
- OFAIM
- PABLIK

W L E U Q R N X H A A A B A I N A T J M
T S T E D A P R R X O E O F A I M O L H
E M K M C W H D Q D F T U H S E E H G F
K S N S P A D T S Y Z J P F G T D Z F U
E O L S E F E M E R E E L R O D A H E R
P N R E E T E Q R S L N A L R Q I L L E
L V H B J B E D I N P E I V G W M T L T
M S A Z J A D N K R G R A S O P A O F O
H M S F I G E A E I O A I D R W N E B I
Q T O S M A L I S T A L E S V E N H A C
N T G N C A A T K T H C O I C A T M K T
R L M V K N I A F T A R I M M E I Y E I
O R T A T G F Q S J O W N L D A Y S T M
G T K S V L E D U K E S E N M R L R A G
R T Z Z S R D D O P D M A L U M A L U E
C F E R A I D K G N A H A I S A P M N D
M A F O O L M O X N F B I L I T Y T W N
S F W S D D K H F I E R L A Q L P G E E
P O A N L D D N A L J X E I N A P I M X
C I O L O F R B E I H N V N K S E N H L

Ansa bilong Wod Pilai isu 2121



No ken putim laip bilong yu long han bilong ol strit kemis

Long kirap bilong dispela mun, Helt Dipatmen i bin putim wanpela tok save long ol pablik long no ken baim marasin ol lain i save salim long strit o long maket. Dispela ol marasin i olpela o i no klia ol i kam insait long kantri olsem wanem.

Dispela tok save i kamap long pablik bikos bisnis bilong salim marasin i kamap wankain olsem bisnis bilong salim buai, daka na smok. Ol lain i wari tasol long kisim mani, ol i no bisi long wanem samting bai kamap long bodi bilong husat i baim marasin na dringim.

Dispela bikpela tok save i kamap bikos ol kantri long wol i wok long wari nau long strong bilong sampela marasin. I luk olsem ol dispela marasin i no moa wok long bodi bilong man bikos bodi i kamapim strongpela banis long rausim ol gutpela samting marasin inap mekim long daunim ol sik.

Wanpela gutpela eksampel em dispela marasin amoxsilin. Planti manmeri long PNG i save ran i go painim dispela marasin long taim ol i pilim sik. Ol i bilip long strong bilong dispela marasin long daunim sik wantu tasol.

Ol i no go sekap long haus sik na kisim pepa bilong baim marasin, nogat. Ol i go baim nating long strit o long tret stua o wanem hap ol lain i salim dispela marasin.

Em long kain pasin olsem na ol dispela marasin olsem amoxsilin i mekim ol dokta na save-



manmeri bilong painim marasin bilong daunim sik, i wari nau.

Ol i lukim olsem marasin i no wok moa long bodi bikos ol pipel i no yusim gut.

Hia long Papua Niugini, marasin i save sot long ol haus sik na helt senta. Planti taim sik-

man i go long haus sik bai ol i harim dispela tok, 'sori marasin i pinis, bai yu yet i go baim long kemis na dringim.' Dispela hap tok i save kamap oltaim, olsem na ol sikman i save painim rot bilong baim marasin. Na pe bilong baim marasin long kemis i antap

tumas o sikman i mas kisim pepa bilong dokta i go soim pas-taim na baim marasin.

Planti lain i lukim olsem dispela rot i hatwok tumas, olsem na isi wei em long baim marasin long ol strit kona o long ol stua we papa bilong stua i no inap

askim long priskripsen pepa.

Dispela tok save long stopim ol pipel i salim marasin long strit bai i no inap long senisim tingting bilong ol pipel.

I mas gat moa awenes i kamap long pablik. Na i mas gat ol pablik helt opisa i raun long ol maket na strit na givim strongpela tok lukaut long ol lain husat i salim ol marasin. I mas gat sampela mekim save tu i go long stopim pasin bilong salim marasin long rot.

Long ol arapela kantri long wol, i gat bikpela tambu tru long man nating i salim marasin.

Yu mas gat hap pepa i soim olsem yu wanpela kemis o save-man bilong ol marasin, na yu mas gat tok orait bilong medikol bod bilong kantri pastaim na yu ken go insait long bisnis bilong salim ol marasin samting long pablik.

Sapos yu no gat ol dispela tok orait na luksave, bai yu no inap. Na i gat bikpela mekim save long husat man o meri i brukim dispela lo.

Hia long PNG tu i mas gat wankain lo na mekim save i stap long stopim ol man nating i salim ol marasin.

Ol pablik tu i mas tok nogat long ol kain lain olsem. Sapos ol pablik i tok nogat, ating bai dispela bisnis bilong salim nating marasin long rot bai i stop, bikos bai i no gat profit long en.

Laip bilong ol manmeri na pikinini, i bikpela samting, olsem na watpo bai yumi putim long han bilong ol strit kemis.

OTML i givim ol kompiuta long wanpela skul

OLSEM 300 sumatin long Finalbin Praimeri Skul long Not Flai Distrik bilong Westen provins i ken lainim besik kompiuta taim Ok Tedi Maining Limitet (OTML) i givim 6-pela kompiuta long ol.

Ol i givim ol kompiuta long skul long wanpela liklik tasol nupela seremoni we ol tisa, sumatin, papamam na ol narapela komyuniti memba i kam lukim long 29 Epril long dispela yia.

Dispela skul i svae stap insait long wanpela bilong ol 6-pela viles main i stap long en na em i save sevim ol komyuniti long Bultem, Kavarobip na Atemkit.

Infomesen Komyunikesen na Teknoloji (ICT) ol Eplikesen na Projek Supavaisa bilong OTML, Sutherland Nele i givim ol kompiuta long skul.

Mista Nele i tokim skul long yusim gut ol kompiuta na mekim gut long edukesen bilong ol sumatin.

"Kompiuta i bikpela samting



Het tisa bilong Finalbin Praimeri Skul, David Kotomi i soim wanpela bilong ol kompiuta OTML i givim taim ICT ol Eplikesen na Projek supavaisa, Sutherland Nele i lukluk.

long ol skul long moden wol nau. Wantaim kompiuta yu ken redim ol skul samting, yu ken putim ol risal na taipim ol asainmen," Mista Nele i tok
Het tisa bilong Finalbin

Praimeri Skul, Davis Kotomi i tokim OTML olsem em i impoten long ol sumatin long ol tisa na sumatin long gat kain ol risos olsem long helpim ol long ol stadi bilong ol.

"Mipela i amamas long OTML long dispela donesen. Mipela i nid long senis olsem skul na wanpela samting long senis em wantaim kompiuta," Mista Kotomi i tok.

Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela via. 52 niuspepa

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K220.00

US\$110.00

US\$150.00

US\$210.00

General Manager
Elizabeth Konga

Editor
Veronica Hatutasi

Published at
Able Building
Complex,
Sec 58 Lot 02,
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



PIH Saveman *Nius*

"I kam long Pacific International Hospital Port Moresby"

Ph: 311 3000/ Ph: 323 4400 Textline 7155 8866 Website: www.pih.com.pg

PNG'S First Heart Artery Stent done at PIH

A patient from Port Moresby who had several arterial blockages in his heart underwent a first and successful multi-stent procedure known as Coronary Stenting or angioplasty, in PNG's first and only Cath lab at the new Pacific International Hospital (PIH) last month, by Dr Richard Chan who is a visiting interventional cardiologist from Cairns at PIH

Another patient a mother of three, Boio Toua from Hanuabada said she was referred to PIH by her heart specialist at the POM General Hospital. Toua said she was having symptoms of Coronary Heart Disease including feeling heaviness and pressure and pain in her chest and shortness of breath.

After a few tests which included an ultrasound video looking at heart strength and valve function called an Echocardiogram, a blood test to check the Troponin level, which can indicate a recent heart attack, ECG which is an electricity recording of the heart and an Exercise Stress Test which - detects hearts condition while patient walks on a treadmill.

The hospital also treated a General Practitioner, Dr. Ray Lakani who was mightily impressed by the procedure, service and facilities.

"I was told I may have blockages based on an ECG and stress level test so I underwent an angiogram which thankfully turned out to be normal with no significant blockage and was negative; that was very relieving," he said.

Lakani said managing five clinics for New Britain Palm Oil (NBPOL) and based in Alotau, considering such treatment at Public Hospitals was not possible and with overseas treatment there was the high cost factor.

"Getting the angiogram done here at PIH in Moresby was very efficient because I live in Alotau and to go to Australia it would have cost 90 to 100 thousand Kina if I needed an angioplasty, while here it cost a fraction of that", he said.

Heart disease is very common in



Boio Toua holding a packets of her prescribed medicine for the heart.

Dr. Richard Chan Interventional Cardiologist talking at the last CME seminar at PIH earlier this year.



Dr. OP Sharma, Boio Toua na Emmanuel Fabila i toktok long FM100 Tokbek so long las mun.

PNG with many people dying of Heart Attacks occurring when a blockage in the arteries slows or stops the blood flow to the heart muscle. This blockage is caused by fatty build-up, smoking, high blood

pressure, high cholesterol levels, diabetes and aging.

Ms Toua said she is happy that she was introduced to the new tests available at PIH cath lab and could have the procedures done here at home. She was informed that her blockages were around 80 and 90 percent.

She is now taking her time and being more cautious before she receives open heart surgery. "I know so much more now that if my heart stops I am gone", Toua said.

Lakani is back to work and although he does not have blockages he was advised to keep his risk factors low to prevent progression of his heart disease. Exercise and eating right are important.

Toua and Lakani both underwent a coronary angiogram which is the gold standard and final say of heart tests to detect blockage in arteries, wherein a catheter (thin tube) is passed up the blood vessel in the arm or groin all the way to the heart and a special dye is injected

X-ray pictures are taken in real time and the dye shows any blockages in the heart arteries and help the doctor decide what treatment is required such as medicine, stents to open the artery right away or refer for open heart bypass surgery to the cardiac surgeon.

Coronary Angioplasty is done in a similar manner in the cath lab usually in the same session as the angiogram if there is blockage and is a treatment rather than a test, where a balloon is pushed over the catheter into the blockage and inflated, pushing the blockage open from within.

Stents are small metal springs inserted in the artery so that when the "balloon" is removed they open up like an umbrella to hold the artery open and maintain the blood flow to the heart muscle.

This surgery is called non-invasive as patient's chest is not opened up by surgeons and can patient is usually able to go home the very next day. Not all cases can be treated with angioplasty how-

ever and there are a few indicators that will require the patient to undergo bypass surgery including a blockage in main left heart artery, blockage at the origin of the heart artery), multiple blockages in one or more arteries, a calcified heart artery or when any artery is 100 percent blocked over a period of time.

Dr Lakani said that in PNG lifestyle diseases such as those to do with the heart must be taken seriously as the financial costs and consequences are high.

For better long term results doctors prefer bypass surgery but angioplasty is best suited for younger patients.

Surgery is now more bearable with new anaesthetics and can now be performed on beating heart as opposed to older methods where the heart was arrested during surgery.

This method allows for early recovery, early discharge and less neurological, kidney and lung complications as well as less blood and blood product requirements which provides better patient compliance and good long term results.

An article was published in the International Cardiac Surgery Journal in support of this by PIH Chief Cardio-thoracic and Vascular Surgeon and Medical Director, Dr. Omprakash (OP) Sharma, who is also a pioneer in such surgical procedures.

After insertion of stents, patients walked out with healthy hearts the next day after a handshake with their doctor. Hopefully, more Papua New Guineans will be saved by Coronary Stenting in the near future. Dr. Richard Chan visits PIH fortnight, while Dr Sharma and his cardiac surgery team are based full-time in Port Moresby at PIH.

Tau requests the public to be aware of their heart symptoms as early diagnosis can save your life and that she may be holding a medical fundraiser soon for her surgery and for further information her brother Rei can be contacted on 72395929.



Now in PNG..the country's first Retina Surgeon

3-Mile Specialist Clinics, 3-Mile Hill, Taurama Road, Port Moresby

Advance Equipment for better diagnosis:

- OCT (Optical Coherence Tomography) to study optic nerve and retina.
- FA (Fluorescein retinal Angiography for diabetic and other retinal vascular diseases)
- A/B Scan (Eye Ultrasound) for more precise diagnosis of posterior segment of the eye
- AUTO R/K Automated Refraction and Keratometry

Procedures for better outcome:

- RETINA LASER for diabetic and other retinopathies
- YAG LASER capsulotomy (for after cataract haze)
- Cryotherapy (cryo-treatment)
- Intravitreal Injection for Diabetes

Tel. 311-3000
email:
pihopd@gmail.com
text to 7155-8866





Ramu NiCo givim fri medikol test long DWU Open De

RAMU NiCo Menesmen (MCC) Limited, developa bilong bikpela Ramu nikel/kobalt main long Madang provins i bin stap na amamas wantaim ol sumatin na pipel bilong Madang long 2015 Divine Word University Open De we i bin kamap long Sande Me 3.

Dispela DWU Open De i save givim Ramu NiCo (MCC) naispela sans long soim aut pablik wanem wok em i wokim olsem namba wan nikel/kobalt maining kampani long PNG na tu long givim ol gutpela infomesen long wok bilong kampani i go aut long ol sumatin na pablik manmeri.

Wankain olsem ol arapela yia i pastaim, Koporet Ofis Dipatmen bilong Ramu NiCo (MCC) i go pas long ogenaism na redim ol samt- ing na i askim ol arapela dipatmen bilong kampani long wok na soim na givim aweanes long ol wok bilong Kampani long dispela Open De long DWU.

Ramu NiCo i putim ol displei eria bilong en wantaim ol lain long Enviromental Helt fakulti biong DWU. Olsem na long bringim tru wanem samtig i save kamap long wok bilong Ramu NiCo, ol i bringim tupela medikol opisa bilong Kampani long Basamuk Rifaineri long go stap long Open De long DWU long givim fri medikol sek long lain i laikim. Ol dispela lain medikol tim bilong Ramu NiCo husat i kam long Basamuk em

Dispela em namba wan taim Ramu NiCo medikol tim i bin wokim kain samtig olsem long DWU Open De, na ol lain husat i go kism fri medikol test i amamas tru bikos ol ino peim wanpela mani.

Dokta Meng i tok em i wokim 25 fri malaria test we em iyusimRDT (repid daignostik tes). Insait long 25-pela lain husat ol i testim em 2-pela em ol i painimaut olsem ol i gat malaria i stap long blut bilong ol. Na ol dispela tupela lain em ol painim olsem ol i gat malaria long blut bilong ol em ol i tokim ol long kism marasin we Ramu NiCo yet bai i givim.

Dokta Meng wantaim nasing opisa Paul Konare i wokim arapela medikol test tu long DWU Open De em ol i kolim spairomita test, na dispela em ol i wokim long 27-pela lain husat i voluntia long sekim lang bilong ol taim i blowim win bilong ol i go long wanpela masin na kism ol riding. Insait long dispela tests, Dokta Meng i tokaut olsem 9-pela lain em tes i painimaut olsem ol i helti stret.

Dokta Meng i tokaut olsem ol arapela lain long dispela

spairomita test ol ol i gat sampela hevi long lang bilong ol bikos ol i save simok o kaikai buai o dring tumas na nogat inap ekksesais long bodi.

“Mipela i amamas olsem planti lain i soim intares long sekim bodi bilong ol,” Dokta Meng i tok.

Dispela Open De i givim naispela sans tru long Ramu NiCo long tokaut na givim ol infomesen i go long ol sumatin na ol pipel long Projek na tu ol wokman meri bilong Ramu NiCo i stap wantaim ol bos lain bilong ol long bekim ol askim ol manmeri i askim.

Ramu NiCo President, Mr. Wang Jicheng, Vice President, Mr. Wang Baowen and other Company executives were present to give their support as well as witnessing the Open Day.

Presiden bilong Ramu NiCo (MCC), Wang Jicheng wantaim Vais Presiden, Wang Baowen i bin raun i go long DWU Open De long givim sapot bilong ol i go long tim husat i stap long eria bilong Ramu NiCo.

More than 200 Project newsletters, Ramu Garamut were distributed, 100 Profile Magazine from Chamber of Mines and Petroleum were distributed including other publications like Sustainability Report and Project pamphlets.

Ol wok lain bilong Ramu NiCo i givim aut moa long 200 Ramu Garamut niusleta na ol arapela infomesen buk na tu 100 Profail Me- gesin bilong PNG Chamber of Mines and Petroleum i go long ol pipel.

The Department of Environment Health of DWU which invited the Company was impressed of Ramu NiCo's participation.

Dipatmen ov Enviromental Helt bilong DWU i amamas tru long stap bilong Ramu NiCo long eria bilong ol long DWU Open De long las wik Sande antap.

Siaman bilong DWU Open De, Ian Labiti i tok em i amamas olsem Ramu NiCo i go na soim ol Projek bilong en na tu kamapim fri medikol sek long stol bilong en.

Ramu NiCo i save amamas oltaim long stap insait long DWU Open De, na stat long 2006 i kam inap tude, Kampani i save putim ol stol bilong en long soim Projek ya long ol pipel bilong Madang provins na PNG.



Ol sumatin raun long Ramu NiCo stol long DWU Open De.



Dokta Meng i wokim spairomita tes long wanpela DWU sumatin long sekim lang.



Ol pikinini i amamas wantaim ol Ramu NiCo wok lain.



Ramu NiCo Management (MCC) Ltd,
the manager of Ramu NiCo Project is proud to host the 5th
NATIONAL MINING EMERGENCY RESPONSE CHALLENGE
in Madang

Date: August 22-25, 2015
Venue: DWU & PNG Maritime College





TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)



Ileksen long Bogenvil i stat long dispela wik. *Poto: ABC*

Ol sapota bilong Wes Papua i wari nau

Laik bilong ol United Liberation Movement for West Papua long kamap memba bilong Melanesian Spearhead Group i luk olsem bai painim hevi nau.

Praim Minista Peter O'Neill i tokim ol nius media long Pot Mosbi long Tunde olsem em i laik Indonesia i kamap memba bilong MSG.

ABC ripot i tok Mista O'Neill i lukim dispela olsem wei bilong dil wantaim ol hevi i save kamap long Papua na Wes Papua provins bilong Indonesia.

ABC niusman long Pot Mosbi, Wesley Manuai i tok Praim Minista O'Neill i mekim dispela toktok bihain long em i bin bung wantaim Presiden Joko Widodo long Tunde moning.

Em i tok tupela gavman i bin sainim tu tupela MOU agrimen long wokbung long bisnis na pait egens intenesenel kraim.

Bogenvil ileksen i kamap gut

Wanpela man husat i stap na wok long Arawa taun i tok ol wok long ileksen long tupela de i go i bin gutpela tru. Peter Arwin i toktok wantaim ABC long Arawa na i tok i no gat hevi long sait long sekyuriti na ol man na meri long taun i fri long vot.

Maski i bin gat ol ripot long planti pipel i no lukim nem bilong ol long ol komon rol long ol narapela hap, Mista Arwin i tok em i no harim wanpela kain hevi olsem yet long Arawa.

Mista Arwin i tok konstituensi bilong em i stap antap long Panguna, tasol i gat ol balot bokis tu long Arawa we ol woka long taun i ken go na putim vot bilong ol.

Tasol em i tok, olgeta poling stesin long Arawa i bin pulap stat long Mande i kam inap nau long wanem ol pipel i laik vot long dispela impotan ileksen long Bogenvil.

Moa long 340 kendidet, wantaim 35 ol meri i resis long kisim wanpela long ol 40 sia long Bogenvil Palamen.

Ekting Komisina Kamuai i tok em i lukim olsem ol pipel i laik stap long dispela ileksen long wanem em i taim we em inap opim rot bilong independens referendem.

Dispela vot long referendem bilong

kamap independen i bin stap insait long Bogenvi Pis Agrimen em ol i bin sainim long yia 2005.

Bikpela welkam long Presiden Joko Widodo

Presiden Joko Widodo bilong Indonesia i bin gat bikpela welkam taim em i kamap long Pot Mosbi long wanpela opisal lukluk raun long PNG.

ABC ripot i tok gavman bilong PNG i makim visit bilong President Widodo wantaim wanpela 21 gan salut long Jacksons ples balus na sekyuriti i bin strong tru.

Ol sekyuriti i stap long olgeta hap long ples balus na polis ben i bin pilai tu maski i bin gat bikpela ren i pundaun.

Bihain long welkam long ples balus, Presiden Widodo na meri bilong em i go bungim Gavana Jeneral, Sir Michael Ogio na long Tunde ol i bungim Praim Minista Peter O'Neill.

Tupela i toktok long ol kain kain wokbung namel long tupela kantri.

Indonesia Papua Atonomi i no inap wok gut

Siaman bilong Free Wes Papua lida long Papua Niugini, Fred Mambrasar i tok Indonesia Papua Atonomi bai i no inap wok. Em i mekim dispela toktok long taim bikpela miting i kamap long Jayapura.

Em i tokim ABC nius olsem planti moa ol Melanesia pipel aninit long rul bilong Indonesia i no laikim atonomi. Em i tok ol i laikim independens.

Mista Mambrasar i mekim dispela toktok taim ol lida long ol sevenpela rijon long Papua provins i redi long holim wanpela bung bilong ol long Jayapura long dispela wiken.

Dispela gren Asembli bai toktok long sait long graun na dispela spesel atonomi lo we i bin stap long 10-pela yia pinis.

Nius ripot i kam long Jakarta i tok, ol traibel lida i no amamas long wanem ol i no stap insait long dispela Papuan Lejisletiv Kaunsil olsem atonomi lo i tok.

Na Mista Mambrasar i tok dispela lo bai no wok long wanem, i no ol pipel long ples nau i mekim ol ol dispela sif.



Presiden bilong Indonesia Joko Widodo i kam raun long PNG long dispela wik. *Poto: ABC*

Katolik Sios egensim Det Penalti

Katolik sios long Papua Niugini i tok em i amamas long toktok bilong Praim Minista Peter O'Neill long lukluk gut gen long lo bilong det penalti long kantri.

Father Victor Roche Seketeri bilong Katolik Bisop Konprens bilong PNG na Solomon Ailan i toktok wantaim ABC nius taim Presiden Joko Widodo bilong Indonesia we i gat det penalti i kamap long Pot Mosbi.

Long stat bilong dispela yia ol i bin tokaut olsem gavman bilong PNG bai kilim 12-pela pipel em ol i stap nau long det row, tasol ol sios i wok long sanap strong egensim dispela lo bilong det penalti o kilim man i dai.

Sampela toktok i kam long PNG i tok olsem dispela toktok bilong Praim Minista Peter O'Neill long lukluk gut gen long lo bilong det penalti, i mas kamap bihain long planti toktok i kam long planti kantri long wol husat i egensim pasin em Indonesia i bin mekim long kilim 7-pela kalabusman, wantaim tupela sitisen bilong Australia long karim hait ol drags.

Ol i bin planim dispela tupela Australia, Andrew Chan na Myuran Sukumaran long wik i go pinis long Sydney.

Father Victor Roche i tok lotu Katolik i bin tok pinis olsem em i no wanbel long det penalti.

Wes Papua Indonesia media

Ol lain militeri bilong Indonesia i save stopim yet ol niusman long go insait long ol provins bilong Papua na Wes Papua maski sapos Presiden Widodo i tok bai ol i stat long larim ol jenalis i go long dispela ol provins.

Ronnie Kareni, wanpela Wes Papua ektivis long Australia i mekim dispela toktok bihain long Presiden Widodo i bin raun i go long Wes Papua long wiken we em i bin rausim faivpela Wes Papua pipel long kalabus na tokaut tu olsem bai ol niusman i ken go nau long Papua na Wes Papua.

Ol gavman bilong Indonesia i no save larim ol niusman bilong ol narapla kantri long go insait long Papua na Wes Papua long planti yia nau.

Ol Turis Sip i helpim bisnis long Vanuatu

Planti bikpela turis sip i wok long go het na bringim ol turis long Vanuatu, maski saiklon Pam i bin hamarim gut turis bisnis long hap.

Ol bikpela turis sip i wok long helpim wok turis long Vanuatu long kamap gut gen bihain long saiklon Pam i bin kamapim bikpela bagarap tru long mun Mas.

Dispela em toktok bilong Julia King, sels na maketing menesa bilong Evergreen Vanuatu wanpela turis kampani em ol Ni Vanuatu yet i papa long en.

Saiklon Pam i bin bagarapim planti turis bisnis na kamapim hevi long planti wokman-meri long ol dispela turis bisnis olsem ol hotel, ol haus kaikai, wok bilong transpot na planti ol narapla wok.

Julia King i tok planti hotel i pas yet na ol i bungim hevi yet long wanem planti pipel i bin kenselim ol wokabout bilong ol bihain long saiklon Pam.

Tasol em i tokim Redio Australia olsem ol Ni-Vanuatu i strongpla pipel na bai ol i orait.

Ni-Vanuatu woka bai bungim hevi

Jeneral Seketeri bilong Vanuatu Kaunsil ov Tred Unions i tok gavman i rong long larim ol woka long kisim sampela ritaiaman mani bilong ol.

Mista Ephraim Kalsakau i tokim ABC Nius olsem tingting bilong Vanuatu gavman long larim ol wokman na meri long rausim sampela mani em ol i save putim long Vanuatu Nesenel Providen Fan bai kamapim bikpela hevi long ol wokman long bihain taim.

Mista Kalsakau i mekim dispela toktok bihain long samting olsem 5,000 woka i askim VNPF long kisim 20 pesen long ol ritaimen fan bilong ol.

Gavman aninit long stet of imejensi lo i bin givim tok orait long ol wokman na meri long kisim mani long VNPF long helpim ol yet bihain long saiklon Pam i bin bagarapim kantri long mun Mas.

Tasol Mista Kalsakau i tok em i wari tru long wanem taim ol dispela woka i pinis wok, bai ol i no gat inap mani long lukautim sindaun bilong ol na ol famili bilong ol.



LinkPNG

From the Highlands to the Islands.. Linking our PNG

**Book
Early for
these
Low Fares**



**Mt Hagen/
Kiunga
K409***

**Mt Hagen/
Lae
K321***

**Port
Moresby/
Losuia
K494***

NEWEST DESTINATION

***Airlines, one way tax inclusive**

Call Toll Free 180 5465, visit www.airniugini.com.pg or your nearest travel office.

Alternatively email us sales.linkpng@airniugini.com.pg

Terms and Conditions apply



www.facebook.com/linkpng



TRUKAI INDUSTRIES SAPOTIM RAIS NA WOK EGRIKALSA INSAIT LONG PNG

HET TOK: Go pas long Sastenebel Rais Developmen bilong Kaikai Sekyuriti long PNG



HET TOK: Go pas long Sastenebel Rais Developmen bilong Kaikai Sekyuriti long PNG

Toktok i kam long CEO



Sif Eksekutiv Opisa bilong TIL, Greg Worthington-Eyre.

Esien Developmen Benk i givim liklik mani mak olsem 15 pesen long ikonomi bilong Papua Niugini long gro insait long 2015. Wantaim dispela gro bai gat planti ol benefit na ol salens tu olsem na emi impoten tru olsem olgeta pipel insait long kantri mas gat gutpela kaikai long.

Trukai Indastris Limitet, em i kampani we i save wok bung wantaim olgeta insait long kantri, i save givim namba wan kaikai bilong PNG - em rais - long liklik prais na bai go het yet.

Kampani bai skelim gut ol gutpela rot long developim ol hap bilong planim rais insait long PNG. Dispela bai helpim long givim wok long ol lokal pipel na tu givim ol samting go insait long faktori bilong kampani long Lae, Morobe Provins.

April 25 bin makim namba tu Trukai Rais na Egrikalsa Developmen Fil De bilong Trukai Indastris long Erap Fam long Makam Veli. Long dispela de, Trukai Indastris i bin serim ol save bilong em long kamapim bikpela wok blong rais prodaksen insait long PNG, na long yusim ol liklik fam holda long planim na salim rais .

Bikpela astingting bilong mipela long wokbung wantaim ol pipel bilong PNG em i olsem, ol pipel i papa bilong graun tasol insait long patnasip we i gat wanbel, mipela bai helpim ol lokal pipel long wok long graun bilong ol na tu stretim rot blong ol ken salim rais bilong ol.

Moa yet, mipela nau wok long lukluk long planim bikpela hap bilong rais, wantaim ol bikpela masin, long ol pailot eria insait long Sentral na Wes Niu

Briten provins. Long wankain taim, mipela wok longskelim ol narapela ol eria tu we rais faming wok long go het long dispela taim.

I kam inap nau, kampani putim bikpela mani tru long wokim skul na tes bilong ol kain kain rais , ol rot bilong lukautim graun na planim kaikai, kwalati na kamapim ol nupela save long sapatim egrikalsa sistem long ol pleslong PNG.

Dispela bung em i namba wan kain samting long kamap insait long PNG tasol em i gutpela sans bilong Trukai Indastris long soim komitmen bilong em long developim gutpela rais indastri insait long PNG na tu ol narapela wok bilong egrikalsa.

Olsem kampani, mipela i amamas long wok bung wantaim ol ogenaisesen

olsem PNG Yunivesiti bilong Teknoloji, DAL, NARI na IRRI long ol projek we i lukluk strong long developmen bilong sid, lukluk gut long ol binatang, kontrolim ol wid o ol liklik gras nogut, skelim graun, na ol narapela ol rot bilong kamapim wok didiman insait long ol ples.

Trukai Rais na Egrikalsa Developmen Fil De long mun April bin gat ol kain kain aktiviti olsem wei bilong planim rais insait long bikpela hap graun, , ol nupla wei bilong kontrolim ol nogut gras na soim bilong ol nupela kain kain rais we kampani wok long planim long dispela taim. Ol patna blong Trukai Indastris tu bin kamap long dispela de long soim wanem kain ol sevis ol gat long em long helpim wok egrikalsainsait long PNG.

Rais na egrikalsa projek bilong TIL



Opereta bilong Trukai, Joseph Haino, i soim ol lokal fama long yusim wanpela pawa tila long ples Amadi-Baga, long Sentral provins.

Rais Projek Tim bilong Trukai Indastris i save lukautim olgeta rais developmen wok long sampela hap insait long kantri, wantaim tu Lae het opis na i save mekim ol wok bilong kampani insait long faming na egrikalsa long Papua Niugini.

Em i gat wanpela komesel kau prodaksen unit long Erap. Kampani nau wok long glasim wok kamap bilong miksfamwe bai planim rais, lukautim ol kau, gren stok fid na ol liklik wok bilong lukautim pik na kakaruk, na tu testim ol stokfid long helpim ol fama long mekim mani.

Dispela Rais Projek i gat samting olsem 50 ol wokman na meri insait long wok operesen bilong em. Taim wok i go bikpela insait long ol komyuniti, ol fama bai gat sans long kisim manitaim ol i salim rais bilong ol na ol narapela samting long fam go stret long kampani.

Bikpela tingting bilong rais developmen projek em long sapatim ol lis holda, ol fama na komyuniti long kamapim wok antap long graun bilong ol na long wankain taim, stretim rot bilong olgeta rais fama i ken salim rais bilong ol. Trukai Agri-bisnis bai promotim senis na go het wok egrikalsainsait long

PNG. Antap moa long dispela, projek i laik lukim olsem ol wok bilong egrikalsa imas wokim gut mani na i ken stap longpela taim.

Erap fam bilong mipela, wantaim tingting bilong kamapim miksfamwe bai soim wanpela kain wei insait long wok egrikalsainsait long kantri, long wanem rais i save gro long sotpela taim tasol - olsem 130 de. Tasol imas gat ol narapela ol kaikai tu i mas gro long wankain taim, wantaim lukautim bilong ol fam enimal, long givim moa sans long wokim mani, antap long planim rais.

Trukai bai wok long senis yet. Wantaim kamap bilong Trukai Rais Projek Tim, kampani i wok long lukluk long kamapim ol gutpela ol sosel, ikonomik na egrikalsawok. Planti ol komyuniti trening i wok long helpim ol fama long kamapim ol gutpela wok bilong fam na tu kirapim planti sans bilong ol man na meri na ol yut long gat wok. Dispela i bin kamap taim ol komyuniti ibin sanapim ol risos senta insait long Morobe provins. Wankain tingting bai kamap long ol narapela hap insait long PNG.

Trukai Rais na Egrikalsa Fil De



Lephan: Kombain havesta i wok long Erap Fam, long Makam Veli.



Raithan: Ol kau long stok-yad bilong Erap Fam.

Trukai Rais na Egrikalsa Developmen Fil De em i namba wan kain bung we i save kamap insait long kantri, we i soim invesmen bilong kampani insait long wok blong rais na tu ol narapela ol wok egrikalsa.

Dispela bung bin kamap long April 29 long dispela yia. Dispela bikpela bung bin lukim haves o katim rais insait long 120ha. Dispela em i namba wan taim bilong dispela kain ol wok bilong rais, statim long planim, spreim na haves, long kamap insait long PNG.

Objektiv o astingting:

- Long serim save bilong wok kamap bilong komesel rais long PNG.
- Skelim tingting bilong planim planti moa rais we i yusim ol masin spoke
- Kamapim rais model we bai lukim wok bung bilong ol fama na komyuniti
- Kamapim wok painim aut bilong rais na tes long ol kain kain rais, ol wei bilong lukautim graun na planim kaikai na kwalatiblong rais
- Kamapim ol nupla wei bilong sapatim wok egrikalsainsait long ol ples

Ol Program bilong mipela:

- Soim wei bilong planim planti rais long bikpela graun
- Soim ol nupela wei bilong kontrolim ol gras nogut
- Soim ol nupela kain rais
- Senseri na Kwalati asesmen bilong ol nupela kain rais
- Bung wantaim ol provinsal patna na papagraun
- Ol masin bilong ol liklik rais fam i kam long ol egrikalsa saplaia
- Soim ol egrikalsa sistem na yusim ol Viles Risos Senta

Ol Patna bilong mipela:

- Trukai i save serim ol save wantaim sampela ol bikpela patna insait long wok egrikalsa:
- PNG Yunivesiti bilong Teknoloji
- Nawaeb Distrik, Morobe Provins
- Nesenel Egrikalsa Rises Institusen (NARI)
- Wes Nu Briten Provinsal Gavman (WNB)
- Kairuku na Hiri Distrik, Sentral Provins
- Wimen insait long Egrikalsa Faundesen Inc
- Sibi na Naramanghi Risos Senta
- Oro groa Kopretiv



CEO bilong Trukai Rais i soim ol liklik rais grein long Agrikalsa na laipstok Minista, Hon. Tommy Tomscoll.

HET TOK: Go pas long Sastenebel Rais Developmen bilong Kaikai Sekyuriti long PNG



Rais Projek Opisa, Aina Davis, i wok long wanpela mini havesta long Gabmatzung, long Lae, Morobe Provins.

Sapotim trening bilong ol lokal saveman na meri bilong rais

Kampani insait long wok bung wantaim ol egrikalsa trening na risets institusen inap long givim trening sapot bilong ol nupela woklain na tu ol rais fama long kantri na ovasis. PNG i no gat planti wokman long kamapim ol bikpela wok kamap bilong rais o long sapotimol fama long lukim wok bilong rais i go bikpela moa yet.

Wanpela rot tasol em long ol fama long helpim ol yet long pasin bilong wok bung. Dispela infomal trening i save kamap long pasin bilong ol long toktok wantaim ol yet naol i skulim ol yet. Tasol, long ol fama ken amamas long kisim save long pasin bilong planim rais, Trukai Indastris i save givim trening sapot wantaim wok bung bilong Yunivesiti bilong Teknoloji (Yunitek) na ol nara-pela ol bikpela skul.

Aninit long bikpela tingting bilong rais developmen, Trukai i save kisim ol yangpela greduet long Yunitek long mekimtrening long fam bilong kampani long sait bilong planim rais, kisim save ol kain kain rais, luksave long kontrolim ol gras nogut na binatang, luksave long gutpela graun na wei bilong havestim rais grein.

Sapot bilong sponsasip bilong nau i lukluk long karamapim ol risets grent. Dispela mani save lukluk long mak olsem 5 pesen bilong ol top sumatin greduet husat i save wokim skul o stadi long ol dispela topik. Dispela i strongim save na ol infomesen bilong mipela long kamapim wok bilong rais.

Trukai Indastris i no long rais tasol. I gat tingting long ol pipel, komyuniti na envairomen yumi stap long en. Long sait bilong ol

wokman na meri bilong mipela, kampani save lukluk long kisim ol gutpela ol wok-lain na helpim ol long luksave na strongim ol driman (long wok) bilong ol.

Ol gutpela senis we wok long kamap long bisnis bihainim tasol ol gutpela ol pipel mipela i kisim ol long wokna helpim long trenim ol.


Dispela komitmen long developim human risos i karamapim olgeta wok operesen bilong bisnis, statim long fam, prosesing, distribusen na maketing.

Mipela gat bikpela tingting long stretim rot we bai helpim long kamapim ol gutpela saveman na meri long wok bilong rais long PNG.

Dispela em wanpela komitmen we mipela i no inap les long wokim, long helpim ol pipel bilong Papua Niugini.



Saveman bilong rais long SunRice, Chris Quirk (namba tu long raithan), i skelim namba wan rais haves bilong Vekabu fama, Sif Gabriel Maia Haino long Janueri long dispela yia.



Trukai na ol komyuniti risponsibiliti program bilong en



Tupela wokman na meri bilong Trukai sanap amamas wantaim Noel Zemming bilong SP PNG Hunters.

LONG TRUKAI, mipela i save amamas tru long sapotimol komyuniti bilong mipela na kamap namba wan kampani bilong wokim senis insait long PNG. Mipela i putim han long developim Egrikalsa, Edukesen, Helt, Kalsa na Turisim.

sponsa bilong Warwagira Mask Festival, Goroka So, Morobe So na Kenu na Kundu Festival.

Helt na Sefti

Mipela gat bilip longol pipel mas stap helti nakaikai gutpela kaikai. Wantaim dispela astingting, Trukaii save sapotim wok bilong ol sampela sariti olsem Cheshire disabiliti sevis na Pot Mosbi Siti Misin.

Kalsa na Turisim

Mipela i save amamasim ol kain kain kalsa bilong PNG olsem ol

Moa long dispela, mipela i givim helpim tu long ol helt awenes program bilong HIV/AIDS, Malaria, TB nakensa bilong susu.

Long Trukai, sefti em bikpela samting long mipela.

Wantaim helti na seif wokfos, ol wokman na meri ken go bek long haus o ples long lukim ol famili bilong ol, long olgeta de. Long 2014, kampani i amamasim 40 milien man aua wantaim nogat bagarap (LTI).

Edukesen

Mipela i bilip long ol meri long ol komyuniti mas gat sans long wok. Trukai em i platinum sponsa bilong Trukai Komyuniti Awat long Wespek Autstending Awat bilong ol meri.

Spots

Mipela i amamas long sanap olsem namba wan sponsa bilong bikpela iven long kantri, Trukai Fun Run, we PNG Olimpik Komiti i serim patnasip wantaim mipela insait long 15 yia nau. Olgeta mani bilong salim ol Trukai Fun Run



Trukai i save spona tu long WOW Komyuniti Awat.

sioi i save go long helpim Tim PNG taim ol i go long ol intanesenel pilai.

Mipela i save sapotim tu ol nara-pela ol developmen bilong nesenel spot wantaim sponsa helpim. Kampani em i namba wan sponsa bilong Trukai Spots program long nesenel televisen netwok bilong kantri, EMTV.

Insait long 20 krismas pinis, Trukai Indastris em i sponsa bilong Weillifting long PNG. Dispela sponsasip go

long PNG Weillifting Federesen lukim win bilong tupela gol medol bilong Dika Toua na Stephen Kari long 2014 Komonwelt Gems long Glasgow, long Skotlen na tu 4-pela awat igo long 4-pela weilifta long 2015 SP Spots Awat.

Trukai i save sponsa tu long Harlequins Ragbi Yunien klap (PNG), Not Kwinslen Kauboi (Australi) na SP PNG Hunters.

PNG Lewas i makim gol long Pasifik Gems

PASIFIK MMI PNG Lewas Kriket Tim Kepten, Pauke Siaka i gat strongpela bilip olsem namba wan PNG meri kriket tim long pilai insait long Pasifik Gems long Julai bai kamap sempion long gem, wantaim lidasip bilong em.

Siaka, i gat 29 krismas bilong Hanuabada long Nesenel Kepital Distrik na em i marit long Vais Kepten bilong PNG Baramandis, Assad Vala.

Em i tok, tim i lukluk nau long kisim stret win bilong ol long Pasifik Gems, long wanem ol i bin kisim mak bilong kraun sempion pinis long is Asia Pasifik rijon bihain long Intenesenel Kriket Kaunsil (ICC) Is Asia Pasifik (EAP) Tropi long Siapan long las yia.

"Mipela bai pilai egens long ol tim bilong pasifik olsem Samoa, Vanuatu, Nu Kaledonia na Kuk Ailan pinis, na mipela kilim ol long ICC intenesenel fiksas long yia i go pinis, olsem na mipela i strong olsem mipela bai holim taitel olsem sempion bilong Pasifik," Siaka i tok.

Pauke i stat pilai kriket long taim em i gat 19 krismas wantaim Pot Mosbi Kriket Asosiesen, na nau em i soim tru kala bilong em long ol lain bilong makim Kriket PNG olsem em inap go pas long ol meri long kisim biknem long taim Pasifik Gems na ol narapela intenesenel ICC fiksa i kamap long yia i kam yet.

"Mi bin stat pilai wantaim PNG Lewas wantaim namba wan gem bilong mi long 2008 na mi mekim we bilong em i go antap inap mi kisim mak bilong kepten. Mi bin stap kepten bilong Pot Mosbi Kriket Asosiesen klap tim, Mariners, olsem na mi gat strongpela bilip olsem lida bilong nambawan PNG meri kriket



Pauke Siaka, Pacific MMI PNG Lewas Kepten

tim, long winim wanpela gol insait long Pasifik Gems," Ms Siaka i tok.

PNG Lewas i gat ol ekspirien meri bilong pilai kriket olsem, Tanya Ruma, Norma Ovasuru, Mebo Ipi na yangpela stail meri, Helen Buruka. Taim ol i bung wantaim ol i kamapim wanpela strongpela tim lain ap, na tu wantaim ol intenesenel ekspirien long winim ol gems.

Meri divisen bilong Pasifik Gems em i hap bilong ICC EAP long kwalifai long 2018 Wol T20. Tupela EAP memba husat i stap long antap tru taim meri resis i pinisim EAP Trai

Seris egens long Siapan long 2016 wantaim wina bilong Trai Series bai kwalifai long go insait long Meri Global T20 kwalifaia bilong 2018 T20 Wol Kap.

Ol las 15 Meri Pasifik MMI PNG Lewas Skwad bilong Pasifik Gems; Pauke Siaka (Keptne), Tanya Ruma, Mebo Ipi, Norma Ovasuru, Varoi Morea, Konio Oala, Helen Buruka, Veru Kila Frank, Kaia Arua, Kopi John, Mairi Tom, Boni David, Brenda Tau, Ravini Oa, Hina Leubana (Milen Be). Ol risev i stap bek: Isabel Kari, Elizabeth Ovo, Kari Serua, Kila Leka

Pasifik Gems bai pilaim soka long Sir Hubert

SIR Hubert Murray Stedium long Konedobu em ples we bai ol i pilaim soka long en, Gems Ogenaising Komiti (GOC) i tok.

8-pela tim bilong ol man na 7-pela tim bilong ol meri bai pilai na resis long husat bai win na kamap namba wan tim.

Sok resis bilong dispela yia bilong ol anda 23 man na meri tim bai kamap olsem Olimpik kwalifaia.

Kompetisen bilong ol meri bai kisim tim i win long kwalifai long Olimpik tonamen taim pilai bilong ol man em long putim ol long wanem ples long Olimpiks.

Long Pasifik Gems, ol bai pilaim tupela tonamen bilong ol man na dispela em Olimpik Kwalifaia bilong ol anda 23 na Pasifik gems Tonamen. Tim bilong ol man bilong Nu Silan bai pilai long Olimpik Kwalifaia tonamen.

Ol bai pilaim 32 soka mets o pilai (man na meri wantaim) na 10-pela long ol dispela pilai, ol bai pilaim long Sir Hubert Murray Stedium, taim ol i pilaim 22 pilai mets long nupela Bisini Fil.

Long lukim pilai long tupela veniu o ples bilong pilai, bai yu peim K10 tasol long wanpela man long wanpela de. Tasol ol dai hat soka lain i ken peim K150 spot pekej tiket na lukim olgeta 32 soka eksen pilai long Gems. Antap long dispela, yu

ken witnessim soka eksen we top tim bai kwalifai long 2016 Rio Olimpiks.

Ol bai pilaim gem bilong opening pilai o pre-opening pilai mets long Julai 3 long Sir Hubert Murray Stedium.

Ol bai welkamim tu Oil Search Pasifik gems Rilei Baton long stedium bihain long em i pinisim 100 de long 22 provins bilong PNG.

Long wankain taim, etletiks "heat" o resis bai stat long Julai 13 long BSP Stediumwanpela de bipo long dispela i stap long progrem bikos bai gat pablik holide ol atoriti long PNG i putim bikos ol i tokaut long dispela de olsem pablik holide long PNG we ol famili i ken yusim long go lukim ol pilai.

GOC i putim toksave i go aut long pablik olsem ol tiket we ol i baim long Julai 18 long lukim ol etletiks em ol i ken yusim tu long ol narapela de we ol bai pilaim etletiks long en. Bilong lukim sampela top etletiks pilai long Pasifik, baik K10 tiket tasol long wanpela de, na peket long veniu em K200. Wantaim dispela, yu bai gat sans long lukim ol pilai olsem etletiks, ragbi 7s na 9s, hoki na bis volibal long 11-pela de. Yu laik kisim moa save long ol tiket, lukim Gems websait: portmoresby2015.com o ringim Hotlaim 1802015.

Blues laik kamap kopiket bilong Maroons

Stori kam long NRL

TUPELA wik moa na bai ol dai hat fen bilong Stet ov Origin long PNG bai stat karim ol blupela na repela plak bilong tupela bikpela tim, 'Blues' na 'Maroons' long ol strit.

Tasol nau yet namel long tupela tim bilong Origin long Australia i wok long pait resis long toktok bilong husat i wok long makim husat?

Wanpela toktok i kamap olsem biknem Maroons kosa, Mal Meninga i wok long bihainim lek mak bilong ol Blues kosa biknem Laurie Daley long go long Yunaitet Stets. Daley i bin go long wanpela stadi wokabut i go long Amerika na taim em i go bek long Australia, ol lain long Nu

Saut Wales i wok long tok olsem, Meninga bai stap kaikai das tasol bilong NSW.

Tasol, Meninga i lap tasol na i tok "Mi go pinis go pinis long US 4-pela yia i go pinis na tu mi go planti taim pinis. Em tingting bilong ol Niu Saut Wales tasol long tok olsem ol i wok long kamapim nupela rot."

"Olgeta man i wok long traime long soim ol sistem na program bilong ol. Em i gutpela long tupela ogenaiesen bikos em bai mekim Origin i kamap gut moa. Mi no wari long wanem samt- ing NSW i tok tok. Em i wankain tasol long wanpela stet i resis wantaim narapela stet, na wanpela pren i resis wantaim narapela pren," em i tok.

Long wankain taim Sia-

man bilong Queensland Rakbi Lig, Peter Betros i givim salens long Blues long kamapim sampela nupela tingting bilong ol yet.

"Wanem taim tru bai ol NSW i stop long makim mipela long olgeta samt- ing mipela i wokim?" Mista Betros i tok.

"Ol ting olsem em i nupela samt- ing long go long Amerika tasol, Mal em i go pas long en 4-pela yia i go pinis," em i tok.

"Nau tasol ol Blues i kirap no gut na salim Laurie Daley i go long hap. Ol i makim stail bilong mipela long fen de, nupela Origin kem, na nau stap wokabut i go long Amerika. Ol i wok long lukim ol stail bilong mipela i kamap wina olgeta taim na ol i laik wokim wankain tu," em i tok.



Mal Meninga, namba wan kosa bilong Queensland Maroons. Foto: Nicky Bernard

OL Rabbitohs i luk olsem bai i no inap lukim pes bilong Adam Reynolds inap 8-pela wik tasol John Sutton I no kisim bikpela bagarap tumas long ai bilong em bihain long South Sydney's 16-10 win long ol St George Illawarra long Monde nait.

Star hap-bek Reynolds i bin pilai strong bihain long em i kam bek bihain long em

i bin kisim bagarap long skru bilong em tasol em i brukim pinga bilong em. I luk olsem bai em i sindaun long sait lain inap 8-pela wik samt- ing.

Ol Southys i wari nau, bikos ol i bin lus long 3-pela gem long taim Reynolds i no bin pilai bihain long em i kisim bagarap lopng skru bilong em. Nem bilong Reynolds i bin kamap long

seleksen bilong Nu Saut Wels long Stet ov Orijin tasol i luk olsem em i no gat sans nau..

Sutton, i bin kam bek gen bihain long em i brukim wisket bilong em long taim ol i pilai egens Dragons long raun tu, i bin kisim bagarap long ai 18 minit tasol bihain long gen i stat na i lusim fil.

Moa long 130 Pasifik Gems draiva i kisim trening ... Pindiu Transpot na Lojistiks kisim kontrak

SAMTING olsem 132 draiva husat bai wok long Pasifik Gems i bin stap insait long wanpela wik trening las wik long redim ol long Gems.

Ol dispela draiva i bilong Pindiu Transpot na Lojistiks Kampani we Gems Ogenaising Komiti (GOC) i kisim ol long kontrak long karim ol etletiks o pilai na ol opisel long taim bilong Pasifik Gems long mun Julai.

Trening i bin givim ol lain i kamap ol trenspot plen, ol rot we ol bai bihainim, ol ples we ol pilai bai kamap long ol na ol arapela ples na opis ol bai yusim long taim bilong Gems.

Sampela long ol bikpela samt- ing we woksop i bin lukluk long en long woksop em opisel rut, ol samt- ing we ol draiva bai mekim, ol hap bilong go insait na kam ausait long ol veniu o ples bilong pilai, ol samt- ing we ol draiva bai gat na yusim, ol helt na sefti samt- ing ol draiva i mas gat save long en.

Ol draiva i bin kisim tok klia long Transpot Mal bai stap long Gems Viles long UPNG we olgeta kar bai statim ran bilong ol olgeta de. Waigani Draiv, Wards Rot na Taurama Rot bai gat prairoriti lein long taim ol pilai i stap na tu, long ran bilong ol opisel.

Ol GOC lain bin sekim na glasim moa long 100 Pindiu Transpot na Lojistiks kar long Jack Pidik Park long las wiken na i kami nap nau, kampani ya i gat pinis moa long 75 pesen long ol kar bai ol i yusim long Gems.

Sampela transpot sevis bilong Gems bai stat long Jun 1, 2015.

Adam Reynolds i brukim pinga

Vipers daun tri taim

Nicky Bernard i raitim

POT Mosbi SNS Vipers i pundaun gen long han bilong ol Agmark Gurias long raun 4 pilai bilong ol long Kalabon pilai grun long Kokopo long las wiken. Dispela bai namba tri lus bilong Pot Mosbi Vipers long Digicel Kap resis.

Vipers bin mekim gutpela pilai wantaim ol fowat bilong ol i ran wantaim bal na brukim banis bilong ol Gurias, tasol ol i no pinis gut long kamapim trai. Planti pilaia bilong ol bin mekim planti drop bal wei givim sans long Gurias long kisim planti graun long sait bilong Vipers na dispela givim sans tu long ol long putim trai.

Vipers i gat planti ol gutpela pilaia bilong dispela sisen na sapos ol i tren strong na kisim planti kodisen bai ol

kam bek long winim planti gem bilong ol bipo long fainal kamap. Gurias i wok long winim pilai bilong ol long tripela raun gem na i go pas long lata long pul bilong ol. Dispela wiken bai ol kisim malolo na trening long bungim Isapea long wik 5 bilong Digicel Kap.

Vipers mas trening strong long dispela wik long bungim ol Goroka Lahanis long Goroka long dispela wiken. Vipers i mas winim dispela pilai bai givim gutpela lukluk long ol sapota bilong ol.

Long dispela wiken long Hailans bai lukim Lions bai kisim Mioks long Kundiawa, Eagles bai kisim Wigmen long Mt Hagen, Muruks bai kisim Tumble. Long sait bilong nambis em Tigers bai kisim Isapea long Lae na Vipers bai plai go antap long Goroka long kisim ol Lahanis



Vipers kepten i brukim banis bilong Gurias long gem bilong ol long Kokopo.

Poto: Nicky Bernard

Kriket PNG i opim All-Abiliti Kriket Program long 2015



Wanpela pikinini wantaim spesol nid i traime wanpela kriket dril taim PNG A Tim pilaia, Kohu Dai i helpim.

KRIKET PNG (CPNG) i opim All-Abiliti komponen bilong "Kriket Bilong Olgeta (KBO) Program" long dispela yia long Amini Pak Indo Kriket Nets long las wik.

"Mipela i amamas long lonsim All Abiliti Kriket Program tude taim mipela i lukluk go het long givim amamas long ol pikinini wantaim ol disabiliti. Dispela program i bin wokim bikipela senis long ol lain i givim sevis, ol famili na ol poro husat i bin stap insait long dispela program long las yia, na mipela i gat bilip long go het long dispela long 2015," Opisa bilong KBO, Susan Komang i tok.

"Olgeta taim mipela i save

givim ol dispela klinik, dispela i save givim ol tingting long amamas long gem na kamap hap bilong tim," Komang i tok.

Dispela KBO program em i wanpela program i kamap namel long CPNG na gavman bilong Australia insait long Pasifik Spots Patnasip (PSP) Program long karim aut gem bilong kriket i go bikipela.

Long wankain taim, em i save givim gutpela tingting long ol pipel wantaim ol disabiliti, ol meri, ol viles komyuniti, ol maltikalsa sekta na ol tredisenel lain bilong pilai kriket long stap insait long spot. Dispela yia em i namba tu yia bilong statim KBO Program.

Kamong i tok, "Mipela i plen

long go het long ranim ol kriket klinik bilong ol klaien bilong mipela long NCD, Madang, Westen Hailans, Milen Be, Wes Nu Briten na Morobe provins na mekim go bikipela na gutpela olgeta yia.

Mi laik tok tenkyu long gavman bilong Australia long sapatim Kriket Blo Olgeta Program na helpim long senisim laip bilong ol pipel wantaim disabiliti.

Em i tingting bilong mipela long yusim kriket olsem wanpela tul bilong developmen na awenes long givim strong long ol pipel bilong mipela long ol komyuniti. Mipela bai go het long ranim dispela program dispela yia na planti yia i kam."

Hunters daunim Pride

i kam long bak pes

Pride i strongim banis bilong ol long 10 minit long namba tu tasol dispela i no stopim Hunters long senisim gem plen bilong ol. Hunters kam bek strong long namba tu hap wantaim 4-pela trai na ol Pride kamap wantaim wanpela long fainal skoa 36-16.

Kosa Michael Marum bai i no inap senism lain hap bilong em dispela wiken taim Hunters bai bungim North Devils long Bishop Park Australia.

Hunters nau i mov go antap long namba 5 ples long poin lata na sapos dispela wiken win gen bai ol go long namba 4-pela. North Devils tu i bin winim pilai bilong ol long wiken 26-24 taim ol winim CQ Capras. Sapos Hunters i bihainim wankain pilai long Kokopo bai ol bagarapim sindaun bilong Devils.

Kosa bilong Hunters Michael Marum i kisim Enock Maki kam insait long tim bihain long em stap out long liklik bagarap long bodi bilong em.

Lain ap bilong Hunters long dispela wiken em; 1 Stargroth Amean, 2 Bland Abavu, 3 Noel Zeming, 4 Thompson Teteh, 5 Adex Wera, 6 Israel Eliab(c) 7 Ase Boas, 8 Henry Noki, 9 Wartovo Puara, 10 Esau Siune, 11 Kato Ottio, 12 Brandy Peter, 13 Adam Korave, 14 Roger Laka, 15 Lawrence Tu'u, 16 Willie Minoga, 17 Enock Maki, 18 Ate Bina.

Kokopo Netbal i strong moa

KOKOPO Netbal Asosiesen i wok long go strong long olgeta wiken. Planti ol kopret kampani i wok long sapatim dispela liklik Asesisesn long pulim ol yangpela meri.

Planti bilong ol yangpela na ol wok meri wok long pilai long dispela kompetisen. Ol bikipela

kampani olsem Ela Motors na ol narapela kampani i putim tim bilong ol long stap long dispela resis bilong dispela yia.

Kalabon Net Kot i save pulap long olgeta Sarere stat long morning long ten klok i go inap 4-klok long apinun wantaim ol B gret tim na A gret tim.


Planti bilong ol yangpela meri nau i wok long pilai netball na soim ol talent bilong ol we ol save haitim.

Kompetisen bilong ol i go insait long namba wan raun na bai lukim ol pilaim tupela raun bipo long ol go insait long fainal bilong ol.



Pilaia bilong KBC Nateks i painim pilai bilong ol em long salim bal taim pilai bilong Toyota Bulls i kam long pasim em long A gret pilai bilong ol long Kalabon Netbal kot long Kokopo. Poto: Nicky Bernard.



Traim Mi: Bikpela fowat bilong Vipers i ran long traim bun bilong Northern Pride pilaia long wiken gem bilong ol long Kalabon Kokopo.



YU MEME: Tupela pilaia bilong Hunters i holim pasim pilaia bilong Pride. Hunters i winim pilai 36-16



BRUKIM BANIS: Bland Abavu bilong SP PNG Hunters i traim long brukim banis bilong Northern Pride long gem bilong ol long Kokopo long wiken.



**WANTOK
PILAIA
PROFAIL**

**HENRY WAN
NOKI**



Bonde: **23/07/1991**
 Kriskas: **23**
 Prowins bilong em:
Western Highlands Province
 Province em i stap nau long em:
Western Highlands
 Yia em i stat piali profesenel ragbi:
2011
 Fes Klap nem: **Kuirai Raiders**
 Digicel Klub nem:
Hagen Eagles 2012
Lae Tigers 2013
 Yia em joinim PNG SP Hunters:
2015
 Posen long Tim (PNG Hunters):
Prop
 Yia o ol yia i pilai long PNG Kumuls:
2014 PMs 13
 Posen em i pilaim: **Prop**
 Namba wan kaikai bilong em: **Taro**
 Kala em i laikim tumas: **Red**
 Bilong wanem sios: **SDA**
 Marit/singel: **Nogat**
 Sapos yes, hamas pikinini: **Nogat**



SP HUNTERS
 now on **tvwan**

PURCHASE A DIGICEL PLAY BOX TODAY K169
 AND GET FRONT ROW SEATS TO ALL THE ACTION!

WWW.TVWAN.COM.PG





IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG

PROUDLY
PNG
MADE

Manufactured by



RD Tuna Canners Ltd.

Moa mit na
oil insait



TUNA IN OIL

Hunters daunim Pride

Nicky Bernard i raitim


SP PNG Hunters i kamapim wanpela gutpela pilai long las wiken taim ol daunim las yia sempion Northern Pride long hom graun long Kalabon long Kokopo.

Hunters i bin namba wan long putim skoa long bod tasol Pride i no westim taim long bekim taim ol kam strong long brukim banis bilong Hunters.

Namba wan hap bilong pilai i lukim tupela tim wantaim i pilaim sem kain pilai we skoa bilong tupela i no stap longwe. Tupela tim wantaim i go malolo long namba wan hap long skoa 10-10.

Kosa bilong Hunters Michael Marum i mekim liklik tenis long pilai bilong ol tim bilong em long strongim banis na mekim tupela man pilai we ol Pride i paul tupela taim long boi Hunters we ol bin skoa long dispela pilai bilong ol.

...moa long pas 29



HOLIM MI: Kapten bilong Hunters, Israel Eliab i ronwe long pilai bilong Northern Pride long Kalaban, Kokopo. Hunters i win 36-16. Foto: Nicky Bernard

INSAIT

HUNTERS
PILAI
PROFAIL

...Pes 31

OL
PASIFIK
GEM
STORI

...Pes 28

→ Treated Mosquito Nets PREVENT Malaria

→ Visitect TESTS for Malaria

→ Arterakine
Tablets TREAT
Malaria

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.
Tel +675 325 3185 Fax +675 325 0190 Email sales@johnstons.com.pg